

東
華
續
錄

東華續錄

咸豐九十九

臣王先謙敬編

臣陶澐宣恭校

三月己丑朔諭內閣聯捷奏請將河北捐輸專辦河北防務緊要經聯捷勸諭彰德等府捐輸經費見在嚴樹森因籌辦南路軍食亦派委員前赴河北勸捐事涉兩歧恐致紳民觀望著照所請所有河北彰德衛輝懷慶三府捐項統歸於防河經費動用以免紛歧○諭軍機大臣等前因景瀄奏俄國分界道路險阻恐難如約會齊當經降旨令該將軍將應辦事宜先期料理並飭成琦趕到照會該夷約期會勘並據恭親王等奏於上年十二月二十七日照會俄酋伊格那提業幅欽派大臣成琦擬於四月下旬到彼會同查勘茲據景瀄奏由興凱湖至圖們江山路崎嶇擬於五月中

旬在興凱湖守候俄國大員勘辦並擬照會呈覽等語會勘俄國分界關繫綦重前據俄國清字來文郭爾察闊幅咨稱烏蘇里分界事宜該國已派阿迪米拉勒喀咱切斐齊於三月間至烏蘇里江口大清國欽差大臣亦應於三月間至該處不得逾時等語自係尚未接到恭親王等照會成琦已於二月二十五日由京啟程著景瀄仍遵前旨將應辦事宜及應需船糧車馱各項先期料理齊備俟成琦一到卽於四月下旬趕至興凱湖與該國會勘地界不可落後至烏蘇里河口一帶雖界限分明僅止立牌等事然亦不可辦理含混致貽後患著卽責成副都統富尼揚阿於四月初間前往妥爲辦理不可遲至五月景瀄俟成琦到後卽定期會同前往毋得以道路險阻爲詞致有延誤將此由六百里諭令知之○諭昨據清盛奏東竄捻股已由安邱回竄清口而另股又由戴

家廟十堡搶渡運河見在李連橋一帶村莊焚掠恐由東阿平陰水漫處偷渡鹽河本日復據杜翻奏東竄捻股由青州竄擾濰縣另股黑黃花等旗又自金鄉闖入直撲東平州之戴家廟並搶渡運河竄至肥城之衡魚莊一帶各等語搶匪更番出擾疲我兵力前股甫退而後股復來致令東省數十餘州縣慘遭蹂躪況業已搶渡運河卽恐其乘虛北竄僧格林沁國瑞暫駐汶上西渡阿駐紮濟甯現在捻匪紛竄毫無堵禦德楞額趙康侯李麟遇等兵勇亦未聞繞出賊前迎頭截剿似此遷延觀望恐致貽誤事機且賊一入東境輒忽無常官兵徒事尾追業已飽掠而去必須於金鄉等處嚴密堵禦毋令竄越方爲善策著僧格林沁等將近日常勢何路喫重官兵如何堵剿及一切布置情形迅速馳奏以慰廑念將此由六百里諭令知之○庚寅毛昶熙奏接辦軍務凡事力

求整頓乃兵未練而賊已至師已行而餉不來晝夜焦思迄無寸
補正月以後髮逆擒匪土匪教匪同時並起除各股竄擒經官兵
屢次擊退其姜台凌等大股南趨所過地方疊被各州縣率勇堵
禦隨時懲創此外則有擒逆孫葵心黨與去歲由汝光竄皖見因
孫逆已故於正月十七日以後竄同固始汝陽陳州等處維時臣
營餉緇兵單不得已派知府廖慶謀安奎直隸州知州秦篤新等
督勇齊國會合各地方官嚴密堵禦一面飛飭駐紮鹿邑圖塔納
亳州孫之友兩軍整隊以待旋據先後馳報孫逆餘黨突竄光州
該知州張席珍登城守禦殺斃二百餘名生擒髮逆四十七名立
解城圍賊遂分股一竄東北一竄光山經光山縣阮鼎固守城池
賊眾由竹竿河西竄兩股合一由正陽之陡溝銅鐘一帶紛竄東
北逆廖慶謀帶勇馳至會同正陽縣知縣鄭修業擒殺一百餘名

息羅等縣均有擒斬賊遂窺伺汝郡其時臣調參將柏英甫抵郡

城同知府祁之銓督率兵勇追殺斃匪多名賊勢不支向東北奔

竄國口固口爲南北商賈輻輳之地賊所垂涎幸該處通判張連

魁派千總趙鵬飛等擊退賊眾駛撲陳州乘勢攻城經安奎等堵

剿四時之久城圍始解副將圖塔納遊擊孫之友復伏兵兜截斬

擒淹斃三百餘人賊始遁歸巢穴然該逆雖暫時喙息不久必裝

旗出竄或與另股勾結均未可知正籌辦間而商固又報粵逆四

眼狗之警兼之正息兩縣伏莽乘機竊發如趙惻良張鳳林等爲

數均不下二三千名光固又有苗練內投誠之潘四踞住三河尖

侵越日甚紛紛請兵急於星火臣擬將駐鹿軍內抽撥一二千名

派員帶赴商固旋准商城縣馳稟該縣會合東境團練擇要扼堵

轟斃多名並聞逆首龔瞎子在松子關被官兵轟斃逆黨回竄豫

境稍鬆等語光州固始報亦相同臣查楚豫毗連利害與其正未

敢以賊蹤漸遠稍弛邊防因將調赴商固之兵交遊擊余萬明管

帶暫駐陳州聽候徵調並以截姜台凌等股匪回巢之路臣願瞻

時勢以有限之兵力禦無定之賊蹤左支右絀力竭精疲臣渥荷

天恩敢辭況瘁惟寇氛愈熾號令不可不一事權不可不專豫

省軍務情形凡大營委用之人無論實缺候補皆撫臣所轄臣此

次實因姜台凌等股捻匪傾巢西竄慮成梟等兵力稍單故派王

天保一軍由太康一帶進發與之會合並派候補道張曜管帶馬

勇馳往會剿乃撫臣忽調王天保赴汝甯矣張曜經過省城撫臣

畱駐三日忽飭赴信陽州矣迨孫逆回巢粵逆漸遠王天保既可

折赴成景軍前張曜亦當與成景會剿而撫臣則又調張曜王天

保赴光州矣斗轉星移迄無定向在撫臣因公起見心本無他而

該員等因此無所適從將來貽誤豈可勝言臣深知撫臣嚴樹森一片血忱胸無芥蒂可與共事而曉暢兵機其才勝臣十倍惟相距較遠當事機湊集之時斷不能待往返函商再行布置可否仰懇 皇上天恩飭令撫臣會合一處辦理軍務至地方公事遞送宋郡亦屬甚便向有前撫臣英桂等出省防堵舊案可循軍務地方聯爲一局庶幾整頓可期而蕩平有日矣 上諭內閣嚴樹森著督辦河南剿匪事宜毛昶熙著幫辦河南剿匪事宜仍督辦河南團練○翁同書奏臣軍八十餘日之中止到協銀一萬兩暨袁甲三借撥銀八百兩計此三月中非有實銀十四五萬兩不能勉強支持而所到不及十分之一豈能維持危局查壽城雖被困日久而正陽之路尙通就城廂而言尙稱安靜無如外間訛言四起謂壽城已被重圍四門緊閉致各省協餉延不起解而報解在途

者委員忱於風鶴裹足不進非但不敢至壽州並不敢至潁州府
嚴札催提置若罔聞至袁甲三允撥之閩餉雖云有著而六安以
南阻於粵氛六安以北阻於苗練更屬萬無可望各營兵勇甚至
挑取野菜及草根充飢臣日出拊循馬步兵勇環泣於前再閱旬
日勢必全潰既潰之後非散而擾民卽轉而從賊不特孤城無以
保全大局尤不堪設想伏乞 皇上嚴飭河南巡撫迅解銀二萬
兩限於十日內運交潁州府轉運局收明臣卽可設法迎提來壽
儻再遲回不解更無一綫生機又奏再苗沛霖見由堰口集運糧
至康家橋一帶踞守該處北通菱角嘴西近正陽關東北距州城
二十餘里風聞該練在六安河內掠船以此正陽一日數驚壽州
情形更爲喫重孫葵心住居亳州之楚店集儻該逆尙存必歸老
巢卽令已死而其黨亦皆在潁亳之間見在賈臻奉旨辦理招撫

必應駐潁州府城若遠赴泗州臨淮中隔賊氛繞道往返動須踰月實有鞭長莫及之虞至泗州糧臺似可派員經理統歸藩司考覈上諭軍機大臣等壽州餉竭兵勇日多餓斃情形異常危迫本日已由六百里加緊諭令嚴樹森迅撥銀二萬兩限十日解至潁州並令嚴催山西委員王致泰迅解餉銀前往壽州營矣見在正陽關一路尙通各處解餉之員或疑道路梗阻不敢前進該前撫需餉甚急亦應遴派員弁酌帶兵勇前往迎提以期迅速解到不可株守坐待疊次諭令袁甲三接濟壽州軍營該大臣尤當設法籌撥以維大局孫葵心黨與皆在潁亳之間賈臻如赴泗州臨淮有鞭長莫及之慮著袁甲三飭催該藩司迅赴潁州辦理招撫事宜泗州糧臺該大臣另派妥員經理統歸賈臻考覈此次翁同書摺報及寄諭交袁甲三由臨淮轉遞以免遺失將此由六百里

各諭令知之○命山海關副都統成保所派官兵五百名暫駐熱河候旨○命按察使銜道員聯捷以四品京堂候補督辦直隸河南山西防河事務○辛卯諭軍機大臣等本日據克興阿等奏移營前進擊賊獲勝一摺朝陽賊匪竄至波羅赤地方經官軍於水泉接仗斬殺多名亟應乘勢進剿一鼓殲滅惟老虎山木頭城子均有賊匪必須節節掃除俾令回巢方可聚而殲旃不可徒事分防致兵力爲賊牽掣賊在朝陽挖濠築牆意在負隅抗拒見在大轡諒已運到成明所帶西安官兵一千名業經啟程兵力已厚著卽督飭將弁並約會盛京官兵四面兜剿毋令竄逸並將鳳凰山一帶踞賊悉數掃蕩不可耽延時日將來擒獲賊目卽於訊明確供後就地正法不必解赴熱河將此由六百里諭令知之○僧格林沁西凌阿國瑞奏據探五旗捻逆四五萬人由金鄉魚臺北竄

臣等因前派兵勇隨同德楞額追剿東竄之賊已去其半當派已革道員黃良楷招募練勇五千名臣西凌阿督帶西安山東駐防官兵暨馬隊分紮牛頭河一帶臣僧格林沁等復派副都統桂成管帶陝甘步隊一千五百名趙康侯帶領練勇二千五百名常山保帶馬隊三百名會同各處鄉團分守東平汶上等處運河又因濟甯長溝地方乃上年匪竄熟路親統馬步隊千餘名前往長溝駐紮該逆自二月十六至二十一等日擁眾直犯運河兵勇奮力守禦不能搶渡連日轟斃擒匪多名二十二日該逆於戴家廟等處橫撲四十餘里復潛擁大股至沈家口迤南沙溝地方該處水淺不過二三尺以致大股搶過運河我軍寡不敵眾疊有傷亡見在該逆盤踞東平汶上之間臣等飭令馬步官兵設法繞至北面再行追剿以遏北竄又據拏獲奸細供稱該逆意圖攻犯濟甯臣

西凌阿已帶防守牛頭河之兵折回濟甯督同該處存營官兵暨在城文武紳團力籌防守 上諭擒匪另股數萬復由金鄉魚臺北竄由沈家口迤南沙溝地方搶渡運河雖經官兵擊斃多名究未大加懲創見在大股盤踞東平汶上一帶著該大臣等飭令馬步官兵扼要嚴防倡令賊匪南趨並設法防其復擾泰安青州等處不可再令北竄僧格林沁等前派兵勇隨同德楞額追剿東竄之賊見存兵力未免單薄不敷防剿惟當聯絡紳團招集鄉勇以輔兵力之不足總期兵民聯爲一氣可冀同心禦侮力遏兇鋒該匪欲由北面攻撲濟甯西凌阿業已帶兵折回著卽督飭文武紳團實力防守毋稍疏懈陣亡官兵著該大臣等查明具奏將此由六百里諭令知之○壬辰諭內閣見在各省軍務未竣亟應簡拔人才講求吏治以期康保小民俾無失所各該督撫於所屬各員

平日立品居官知之有素著擇其廉潔自愛任事實心及素著循聲民情愛戴堪勝道府者臚列政績出具切實考語酌保數員候旨簡用其道員及州縣各官如有出色之員著一併覈實保奏儻所保之人查有貪污劣蹟或名實不符朕惟該督撫是問其各力除積習秉公保薦毋得瞻徇情面任令屬員夤緣倖進以副朕知人安民至意○癸巳諭內閣孫葆元奏江蘇見辦軍務不能考試懇請回京當差一摺江蘇地方雖未能全行考試該學政尙有應辦事件孫葆元請回京當差之處著不准行○甲午諭軍機大臣等色克通額等奏俄國給住京修士固理運送公文包並未知照庫倫又稱該國商人二十一名按照條約任其行走欲自雇蒙古駝隻私立驛站並由獨石口一路行走等語已諭令恭親王等照會伊格那提業幅務遵條約辦理嗣後如有不遵條約之事該大

臣等卽當據理斥駁前諭令將烏槍擇畱數十桿以備京兵在彼演試所餘各件迅速運赴京城據色克通額等奏該國尙未行文前來該國職位由天津海口運送亦未解到此項烏槍運到時卽督率京兵演習其餘暫存庫倫俟總理各國衙門知照運京再行豫備○諭前因張亮基奏參徐之銘任性妄殺並貪財漁色各款當經降旨令劉源灝趕緊馳赴雲南秉公查辦該督接奉前旨諒可剋日赴滇矣茲據徐之銘奏克復富民羅次祿豐廣通四城並元永黑琅阿陋草溪六鹽井請將申有謀等獎勵又攻克安甯收復城池請將總兵何自清等獎勵又保舉督辦東路防剿保衛地方出力之參將何有保又請將已革知府夏家疇開復原官該撫所奏克復地方均係據各路稟報未將接仗情形詳細聲敘恐賊匪自行退出捏稱克復任意鋪張有不實不盡之處所保之申有

謀等是否實在出力著劉源灝到滇後逐一詳查據實具奏參將何有保請記名以總兵用亦覺太優已革知府夏家疇赴夷寨設措經費尤屬支離徐之銘有無贍徇情弊並著該督秉公確查詳細具奏毋許徇隱原摺片四件均著鈔給閱看將此由六百里諭令知之○官文胡林翼李續宜奏准兩江督臣曾國藩咨稱偽忠王李秀城由廣信內犯圍攻建昌府城離南昌省城不遠必須大支勁旅庶保江西完善之區擬移紮建德東流抽出鮑超一軍先其所急又准函稱建昌援兵屢次挫敗撫州亦被賊圍南昌省城震動各等語臣思撫州距省甚近僅有左宗棠一軍勢難堵禦如曾國藩抽撥鮑超一軍則祁門一路又屬空虛設有疏虞所關匪細楚軍圍攻皖桐正在喫緊又賊竄黃州李續宜舒保各統兵上援更無別軍可援江西之急查湖南撫臣駱秉章行抵荊州臣前

以武昌告警商令赴鄂繼因援師已集飛咨停止見聞蜀東一帶均就肅清而江西正當事機緊迫之時似應移緩就急先援江西應請旨飭下駱秉章卽於荊州順流而下助剿楚北竄匪再分軍從九江迅赴南昌會同兩江督臣江西撫臣相機防剿或由駱秉章酌量分兵數千先行馳赴重慶扼守俟江西賊勢平定再行入蜀辦理上諭逆匪上竄湖北復擾江西較四川情形更爲緊迫自應移緩就急督兵援應著駱秉章迅由荊州順流而下助剿楚北竄匪再分軍由九江迅赴南昌會同曾國藩毓科等兵合力剿辦或酌量分兵數千先行馳赴重慶扼守俟江西賊勢平定卽行率師入蜀該撫務須斟酌妥善相機辦理勿稍延緩將此由六百里諭令知之○官文胡林翼李續宜奏武昌爲全楚根本其形勢先重江防當調副將張啟基管帶大小礮船一百十餘號分布武

昌漢陽漢口陽邏團風巴河樊口等處以扼江面一面咨行提督楊載福道員彭玉麟派副將左光培成發翔等管帶水師礮船上駛應援彭玉麟復親督礮船於要隘處所逐節布置以遏賊眾偷渡前因楚軍急於謀皖防兵皆調赴下游省城存兵無多當派副都統巴揚阿等就見存弁兵分要駐守臣等督司道周歷城垣日夜稽查無敢稍懈省城東路以魯家港洪山爲最要西路以黃岡之陽邏街埠漢陽之沙口爲最要北路以黃陂之滢口黃岡之倉子埠爲最要見酌募勇丁配以花凌阿馬隊令副將余際昌等分道駐紮前調荊州旗營官兵一千名見已到省撥赴省城內外駐防人心漸定該逆於黃州城外環築木城土壘意圖負隅抗拒又分竄麻城羅田黃安黃陂孝感等地方前經副將成大吉帶隊扼守松子關連獲勝仗將大股賊匪擊退該逆又繞至蘄水黃州乘

虛分竄知府梁作楫一軍尙在麻邑嬰城固守副都統舒保督帶馬隊自下游馳回於上巴河渡江繞出黃州之上復由團風沙口等處至北岸會同黃州協副將書紳及黃州府縣文武督團截擊因兵力尙單不能窮追查此次賊匪與捻匪聯合人數眾多黃陂距省甚近臣續宜率十九營於二月二十一日繞至武昌同臣官文面籌機宜分路進剿迅掃黃州麻城羅田黃陂德安竄逆兼顧武漢根本隨時探明賊蹤虛實相機剿辦報聞○乙未曾國藩奏據探該逆多聚上溪口意欲撲犯祁門曾飭張運蘭攻剿上溪口一次詎該逆見我軍退後復率大股在上溪口及河村石田小當等處層層築壘與休甯屯溪之逆互爲犄角力抗我師二月初九日卽添派總兵朱品隆唐義訓參將葉光岳等會同張運蘭各率營弁進攻上溪口張運蘭揮眾迎擊刀矛並進施放噴筒火箭賊

巢火起乃破重卡而入追至河干殺斃悍賊數名賊遂大潰時河
村之賊復出萬餘過河迎敵經各營弁擊敗先將上溪口一帶賊
壘燒燬該逆紛竄狂奔我軍追至石田復燬賊營六座賊向小當
敗遁該處復有伏賊接應從九品禹志漣縣丞李公選帶隊趕至
將小當之賊全行擊敗沿途殺賊二千餘名生擒偽領天豫偽將
軍偽檢點等二十八名髮賊八百四十餘名解散難民甚眾我軍
乘勝直抵休甯縣城十一日會齊各營四面環攻墜斃賊上悍賊
多名同知朱聲隆等復帶隊猛撲被燬傷者約四百餘名各營銳
氣不爲少卻該逆見我軍圍剿甚力連夜棄城遁走立將休甯縣
城收復查休甯之賊踞城將及半載賴上溪口一戰連踏逆壘大
挫兇鋒遂得一攻而克在事尤爲出力各員謹先行開列懇恩獎
敘其餘出力員弁容再擇尤彙奏請獎隨亡人員俟查明後再行

請卹 上諭內閣官軍攻破上溪口等處賊巢並擒餘匪
辦甚爲得手河南開歸陳許道張運蘭著交軍機處記名遇有缺
察使缺出提奏記名總兵朱品隆唐義訓均著遇有總兵缺出由
軍機處提奏其餘出力員弁著曾國藩擇尤保奏陣亡人員並著
查明請卹○諭軍機大臣等本日據清盛奏馳抵齊河接仗獲勝
並移營進剿一摺此次捻逆竄至杜家廟地方該署撫督帶兵勇
迎剿雖經小有斬擒究未大受懲創且擒獲奸細既有欲由濟南
一路東竄青口之語不可不嚴爲之防本日據杜翻奏稱賊於初
二日竄入厯城境內段店地方雖經敗退距省未遠難保不去而
復來該署撫見擬移營黃山店著卽督飭兵勇並玉山所帶馬隊
悉力防剿勿令紛竄仍須兼顧省城毋稍疏忽其前起竄赴東路
捻股盤踞安邱著嚴飭明新會同德楞額實力剿洗務須驅出東

境勿畱餘孽齊河團練既經約令會剿何以臨時退避該處團練
係何員所帶著清盛查明參奏並查明該處團練如不得力卽飭
令該地方官認真整頓以收實效另片奏請將東省徵收漕米全
數變價等語本年南糧未能照常起運京倉需米甚殷著清盛仍
將徵收漕米趕緊設法運京毋庸變價將此由六百里諭令知之
○恭親王奕訢等奏請赴行在祇問起居得旨朕與恭親王奕訢
自去秋別後倏經半載有餘時思握手而談稍慰塵念惟朕近日
身體違和欬嗽未止紅痰尙有時而見總宜靜攝庶期火不上炎
朕與汝棣萼情聯見面時回思往事豈能無感於懷寶於病體未
宜況諸事妥協尙無面諭之處統俟今歲回鑾後再行詳細面陳
著不必赴行在文祥亦不必前來特諭○曾國藩奏據報建昌之
賊開挖地道城中兵不滿千危在呼吸援師敗挫賊蹤跟至撫州

等情查撫建去省甚近關繫緊要已調鮑超一軍由九江一帶馳赴江西省城先顧根本次援撫建臣因休甯新克徽州可圖暫緩移營仍駐徽境惟鮑超之軍一動祁門西路建德一帶又將爲賊所踞左宗棠之軍小挫一次祁門南路浮梁一帶亦恐爲賊所阻臣惟有激勵將士力攻徽郡以通浙江之氣而開籌糧之路報聞

○丙申內閣欽奉 硃諭大阿哥於四月初七日入學讀書著李鴻藻充大阿哥師傅○諭軍機大臣等前因翁同書奏買臻辦理招撫應駐潁州當經諭令袁甲三飭令該藩司迅赴該處其泗州糧臺另行派員經理本日據毛昶熙奏潁州團練向係蒞沛霖辦理近來阜陽太和一帶民團因苗沛霖叛形漸露練總牛允恭等赴豫呈訴不願與之共事查解散苗沛霖黨與莫若使阜太團練與豫省合而爲一見派候補直隸州知州秦篤新馳往皖豫兩省

毗連處所辦理團練若令安徽藩司賈臻督辦安徽全省團練實
於大局有裨等語苗沛霖自與壽州團練構釁潁州等處團練恐
流爲逆黨各守堡寨自保身家亟應乘機將潁壽團練歸地方官
辦理使人心有所繫屬苗沛霖自不得託名辦團肆其誘脅袁甲
三於接奉前旨後當已飭令賈臻赴潁著卽催令啟程所有安徽
全省團練卽著該藩司督辦務與豫省淮鹿沈項新息一帶堡寨
及光州各屬民團聯絡聲勢互相援應以散匪黨而順輿情將此
由六百里諭令知之○予河南殉難知縣彭必達祭葬世職建祠
教諭張元祚附祀○戊戌曾國藩奏逆賊黃汶金大股由建德入
犯江西連陷數縣經鮑超從洋塘跟蹤追至彭澤之下泥坂左宗
棠亦派楚軍四營由右路馳追駐紮小麥鋪地方該逆勾結青陽
銅陵援賊仍踞建德縣城大股盤踞金家村黃麥鋪一帶意圖抗

拒正月二十六日鮑超商同總兵陳大富列隊建德牽制城中之賊自率大隊馳至黃麥鋪賊見官軍突至層層密排山谷皆滿鮑超派霆左營副將鄭陽和等由左路攻擊霆前營副將黃慶等由右路攻擊自率副將宋國永等從中路進攻賊見我軍尚未成列遽來撲犯鮑超督飭各營三路齊進賊陣稍動我軍乘勢下壓追奔四十里該逆有撲港淹死者有懸巖跌斃者屍橫遍野鮑超復令各營追至建德適陳大富與水師會攻城賊克復縣城約其斃賊共千餘人逃散者不下萬餘人生擒長髮老賊三百餘名訊明正法江西饒九等屬一律肅清提督銜綬靖鎮總兵鮑超勇冠三軍每戰必克籲懇 天恩交軍機處記名遇有提督缺出請旨簡放陣亡之守備唐有餘請交部從優議卹 上諭內閣官軍攻破黃麥鋪賊匪克復建德縣城饒九境內全數肅清勦辦甚屬得手

提督銜湖南綏靖鎮總兵鮑超著遇有提督缺出由軍機處提奏
陣亡之守備唐有餘著交部從優議卹○曾國藩奏偽忠王李秀
城股匪合圍建昌府城晝夜環攻安肅道劉于濤派兵救援正月
二十七八九等日屢次開仗尙與城中文報不通無論能否解圍
而大股既入內地則或犯南昌省垣或犯瑞州臨江皆不可不豫
爲之防又皖北四眼狗陳玉成大股勾結捻匪四路狂竄聞霍山
官軍敗挫准撫臣胡林翼函商臣處派兵救援北岸亦須有大支
勁旅渡江援剿庶安慶垂成之功不至中棄臣處兵力止有此數
見在張運蘭一軍防剿徽州休甯之賊左宗棠一軍防剿新犯婺
源之賊此外別無勁旅可作他處援兵萬不得已臣當移紮東流
建德防堵下游池州蕪湖各股抽出鮑超一軍作爲遊擊之師或
馳援江西腹地或馳援皖北各路視其尤急者而應之或可少遏

兇鋒 上諭軍機大臣等江西軍務喫緊該大臣前奏飛調鮑超一軍由九江一帶馳赴見在逆匪上竄湖北駱秉章能否分軍馳援江西尙未可定所有鮑超一軍卽作爲游擊之師該大臣體察江西皖北情形何路緊急卽爲何路援應至該大臣請移紮東流建德兼顧皖北之處見在張運蘭一軍防剿徽州休甯之賊是否足資抵禦著曾國藩悉心籌畫不至顧此失彼方爲妥善將此由六百里諭令知之○諭勝保奏捻匪渡河北竄派兵馳赴景州堵剿一語捻匪擾及山東一帶於本月初五日紮筏渡河後隊賊眾蠶擁繼至該大臣見飭總兵伊綿阿酌派官兵遴員管帶先行馳赴景州防剿並飭天津道孫治整齊各屬團練協助官兵嚴防竄擾惟賊勢猖獗所派兵力尙單恐不足以資堵禦著該大臣速飭伊綿阿添派官兵親自統帶馳赴景州一帶聯絡鄉團嚴密堵截

以期力遏兇鋒毋稍遲緩將此由五百里諭令知之○諭嚴樹森奏請飭張芾選將練兵並兼籌全局一摺據稱江淮捻賊及各種土匪日肆猖獗豫省軍務因循疲敝請飭陝甘督撫會同張芾於提鎮各營內精選馬步官兵由張芾統帶來豫會辦防剿並募勇訓練等語豫省軍營積弊日深該撫欲改絃更張力求振作實屬勇於任事惟陝甘各營兵丁歷年徵調頻仍存營兵數無多該省與河南毗連處所見在需兵防堵若再調撥必致完善地方益形空虛前已降旨令該撫督辦河南剿匪事宜事權既一責無旁貸所有練兵選將事宜著卽破除積習實力整頓以期日有起色並就河南見有兵力妥籌防剿以副委任本日已降諭旨令張芾幫辦陝西團練事宜矣將此由六百里諭令知之○命前任左副都御史張芾幫辦陝西團練事宜○以賊竄太湖迎剿失利浙江巡

撫王有齡下部議處○以廣西柳州水陸肅清賞道員劉坤一布政使銜○予浙江陣亡縣丞瞿綬章等祭葬世職○己亥諭軍機大臣等奕訢等奏布魯西亞國通商事宜派崇綸赴津辦理請由軍機等恭擬上諭一道交崇綸齎往給與閱看以免歧誤等語各國公使於欽派大臣接見時往往求看諭旨以爲憑據奕訢等所請擬給上諭以免該公使生疑亦爲先事防維起見惟此次布魯西亞國赴津通商一切事宜仍應歸該大臣等籌辦若另給崇綸諭旨則必須有欽差字樣於總理各國事務衙門轉覺事權不一崇綸赴津似無庸給與上諭或由奕訢等妥擬照會告以各國通商事宜均由總理各國事務王大臣辦理見經奏派崇綸赴津會同三口通商大臣崇厚辦理如以崇綸等非全權大臣或桂良文祥兩人中酌量一人帶同崇綸前赴天津將來換約蓋用印信卽

用總理衙門關防著奕訢等斟酌妥善奏明辦理迂愛倫布既不日抵津崇綸卽著無庸前來行在請訓將此由五百里諭令知之○諭清盛奏帶兵回省安撫居民並歷陳東省團練情形一摺團練之設原以濟兵力所不逮必須官紳一體兵勇同心協力內靖土匪外禦賊氛於地方庶有神益若如清盛所奏山東章邱縣之水寨街新城之南裏里等莊以及博山萊蕪等縣團勇遇有經過客商往來差役輒敢擅行殺戮害及無辜甚至該署撫差弁亦被團丁捆縛奪去馬匹見在捻匪竄入東境勢甚猖獗各處土匪乘間竊發是團練禦賊尙無成效而抗官滋事竟有尾大不掉之勢譚廷襄諒已馳赴新任著將清盛所奏各情嚴密訪查如有藉團爲名肆行不法及私立黑團聚眾抗官者立即嚴拏究辦毋稍寬容其有公正紳士團練鄉民協同官軍殺賊立功者該撫亦當隨

時保奏以昭激勸見在山東擒勢猖獗該撫務須力籌防剿毋令蔓延原摺著鈔給閱看將此由六百里諭令知之○庚子諭軍機大臣等瑛榮奏擒匪計圖西竄添派官兵前赴商雒擇要駐紮一摺擒匪由老河口回竄厚坡李官橋一帶逼近商雒該處隘口紛歧在在與豫境毗連亟應擇要防堵著瑛榮卽飭所調固原提標官兵及原紮盤頭之西甯鎮兵迅赴商南交關不敏統帶同原存防兵妥爲布置如該逆西竄逼近陝境尙恐兵力單薄亟應添派官兵前往助剿毋令竄越至興安府屬之白河平利路通南陽及湖北光化等處亦恐有竄匪闖入並著嚴飭陝安鎮及地方官豫爲防範相機堵禦惟該省地方遼闊官兵勢難處處設防必須聯絡鄉團藉資守助前有旨令張芾幫辦陝西團練瑛榮見署巡撫著卽會同張芾趕緊激勵鄉團務令兵民互相保衛俾賊匪無隙

可乘方爲妥善另片奏陝省協解安徽軍餉應否仍解壽州請旨
遵行等語壽州軍營需餉甚急該省應協皖餉仍著照前解赴壽
州軍營以資接濟將此由五百里諭令知之○辛丑袁甲三奏查
苗練恃強跋扈本不自今日始而其肆意橫行形同叛逆者實藉
口於壽城擅殺一案其意欲將孫家泰懲辦以服練眾之心翁同
書如何辦理臣尙未知底細徐立壯偪近正陽名爲助官其實闖
河搶劫與苗練等臣會同翁同書札委張學醇等統率西路團練
並會帶正陽壽城兵勇以資鎮壓如苗練撤退卽一面扼守正陽
一面先赴壽州辦案至苗練西窺光固從前原有此說幸西路阜
潁練總牛允恭等不願與苗沛霖其事心志甚屬堅定臣因勢利
導批示嘉獎既可分苗沛霖之權並可爲豫疆屏蔽此上游布置
之大概情形也苗練另股擾及泗靈臣先派遊擊張景春等帶兵

堵截詎該練占踞靈境之虞姬墓四出擄糧又有捻股由宿州之符離集等處乘虛東竄必須痛加懲創臣加派副都統善慶等帶馬步六百名前往泗州參將于殿甲等帶勇一千名前赴固鎮爲會合兜剿之計該捻由婁莊徑撲靈璧縣城署知縣李金華帶練出城乘其立營未定繞至賊後兩路兜剿生擒七十餘名殲斃三百餘名奪獲槍礮器械多件該捻旋撲泗州藩司張光第等派兵會練進剿連日均有擒斬泗靈情形稍鬆而捻逆尙未遠遁苗練亦仍在長直溝一帶屯踞見仍畱各路兵練確探賊蹤相機追剿此下游防剿之實在情形也臣查上下游均值多事李續宜回援鄂省到任尙無時日翁同書久病未愈未便強畱查藩司賈臻久歷戎行才識老練相應請旨飭催迅速來皖接署撫篆以重防剿翁同書奏苗練自堰口集折回晝夜運糧調練圍攻壽城將正陽

關雙橋集之路概行紮斷餉道已絕文報不通惟可於湖汊中梟
水而渡城中米價翔踊兵勇久已斷炊不得已向城中住戶勸捐
接濟旬日後斷不能繼而苗練直撲南關搶去馬隊戰馬數匹並
占踞雙橋集近更移營環偪臣疊次遣人撫諭始則似有轉機既
而益形堅執非攻破壽州不可臣連日登陴抱病日重見闕正陽
關亦萬分喫緊無如壽城被圍與正陽聲息不通萬難兼顧尤深
焦灼再據署潁州府事皖南道程鈺飛稟署太和縣知縣侯樞臣
在該縣倪邱集辦理防剿突有本集之劉姓張姓率領數百人進
局請糧刀傷侯樞臣頸項數處旋即殞命等語查侯樞臣在任年
久素得民心何以忽有此變當卽飛飭程鈺設法妥辦務獲正兇
以靖地方而懲頑梗上諭軍機大臣等前因潁壽團練應歸地
方官辦理以杜苗練誘脅業已諭令袁甲三催令賈臻赴潁督辦

安徽全省團練見在苗練上下游肆擾及圍逼壽州情形實已甘心叛逆該大臣以該練平日勦匪有功且爲擒匪所畏尙思牢籠駕馭所籌辦法亦不爲無見惟苗練桀驁已極官兵不能箝制欲除徐立壯等爲安撫苗練之計設該練因此愈形橫恣更將何所措手翁同書久病未痊李續宜到任需時安徽巡撫著賈臻署理卽迅速赴壽州接署撫篆將苗練尋仇一事與袁甲三悉心籌商總期既有把握不可冒昧辦理致滋他變並將團練招撫事宜妥爲籌辦以固人心而消隱患所有陝西省協解皖餉已諭知瑛桀徑解壽州卽著賈臻派員催提前進以濟軍食本日袁甲三奏請飭催各省奏撥餉銀亦諭知文清等速行撥解矣翁同書另片奏太和縣知縣侯樞臣於倪邱集辦防忽被民人劉姓張姓刀傷身死等語是否不法匪徒蓄意滋事抑或該員有激變情事亟應

徹底根究著賈臻嚴飭署潁州知府程鉅將滋事首犯劉姓等嚴拏務獲秉公訊辦毋稍疏縱將此由六百里加緊諭知袁甲三並傳諭賈臻知之○命欽差大臣勝保馳赴直隸山東督辦防剿事宜○癸卯諭內閣克興阿等奏剿匪獲勝克復朝陽一摺賊匪占踞朝陽經克興阿等帶兵進攻賊向東北逃竄官軍奮勇追剿該匪爭渡浮橋落水溺斃者甚多適盛京黑龍江官兵同時趕到賊向山中奔竄我兵擒斬賊目蔣大全一名殺賊一百餘名救出難民二百餘名奪獲旗械多件當將朝陽克復所辦尙屬妥速卽著克興阿等督飭將士探明路徑迅速進攻毋令他竄以致滋蔓在事出力員弁著准其酌保數員毋許冒濫○諭軍機大臣等前因張亮基奏參徐之銘縱令兵練將就撫之回民轟退偪令馬椿齡自盡謀殺招撫委員孫鈞及請託賄賂各款當經諭令劉源灝迅

速赴任將徐之銘撤任查辦嗣因徐之銘奏克復富民等處四城請將申有謀等獎勵恐有捏飾鋪張及保舉不實等情弊復諭令劉源灝秉公查明具奏本日據徐之銘奏激江回匪假名求撫驟撲省城經何自清督帶兵練進攻江右館將徐元吉殺斃連破各營攻克呈貢縣城斃賊數千人請將何自清等鼓勵等語與張亮基前奏情形迥不相符難保非殺降冒功捏情入奏著劉源灝於馳抵滇省後嚴密訪查據實具奏毋稍瞻徇原摺著鈔給閱看將此由六百里諭令知之○諭上年八月間據慶廉奏稱挑選得力勇丁二千名派副將黃得魁管帶啟程嗣因撫局已定該副將帶勇折回見在捻匪竄擾山東已有旨令勝保馳赴景州德州一帶防剿必須厚集兵力固守畿疆著嚴樹森察看該省情形如軍務稍鬆卽派副將黃得魁管帶所部練勇二千名配齊軍裝礮械迅

赴勝保軍營聽候調遣將此由六百里諭令知之○諭見因捻匪竄擾山東地方勢甚猖獗諭令勝保前赴直隸景州山東德州一帶督辦防剿事宜亟應厚集兵力藉資堵擊著文煜挑派督標官兵六百名正定宣化鎮標官兵各八百名共二千二百名務擇其年力精壯技藝嫻熟者不得以老弱充數並將軍裝礮械剋日配齊遴委得力員弁管帶星速馳赴景州德州一帶聽候勝保調遣毋許稍涉遲誤再本日據譚廷襄奏東省捻匪教匪到處肆擾臨清與冀州等處東昌與順廣等處均屬毗連請飭嚴防等語並著文煜卽飭正定鎮及大名鎮道酌帶官兵與山東官兵合力防剿毋得稍分畛域將此由六百里諭令知之○予雲南陣亡署提督褚克昌等祭葬世職知府張同登並於死事地方及原籍建祠○甲辰諭軍機大臣等清盛奏教匪竄入陽穀觀城並館陶縣被匪

闌入旋卽克復見飭濟東道明新等帶兵搜捕並據杜翻奏捻匪南竄省垣附近已就肅清請籌辦修築寨圩並邱縣莘縣冠縣館陶陽穀等縣被匪滋擾請飭派兵剿辦並查參失事及帶兵遷延不進各員各等語山東教匪勾結鹽匪土匪於陽穀等處滋擾疊陷縣城業經清盛派令濟東道明新帶兵五百名由東路趕赴東昌會合參將成志及土默特馬兵剿擊譚廷襄此時諒已到省著卽催令明新等迅速前進並酌量添派得力將弁兵勇合力搜剿盡殲醜類毋任滋蔓署館陶縣知縣周曙東是否聞警先逃賊退後捏稱克復並此外失守文武各員均應嚴行查參以示懲儆參將成志帶兵剿辦如有遲延畏葸情事並著該撫查明參辦邱縣冠縣莘縣匪徒入城前據聯捷奏係由求緩漕糧該地方官撫馭無方激生事端當令清盛查參尙未覆奏著該撫一併查明參奏

其肥城東平一帶擒匪及沂州府屬幅匪應如何派兵堵擊並著
妥爲籌辦至擒匪疊次竄入東境肆行焚掠毫無堵禦以致百姓
慘遭蹂躪杜翻請於省城關廂及各州縣地方一律修築土圩其
圖保護意在堅壁清野惟辦理不善易滋流弊必須素得民心州
縣督率公正紳士善爲經理始不至有聚眾抗糧等事著譚廷襄
體察情形妥籌辦理清盛另片奏安邱失守知縣陳用衡把總石
萬魁不知下落賊向東南竄去德楞額李麟遇先後尾追等語著
該撫查明失守情形及文武下落並此股擒匪是否回巢抑另有
被擾地方詳細具奏將此由六百里諭令知之○恭親王奕訢等
奏參將長善等請畱總理衙門得旨均免其回避然事屬創始尙
可權宜辦理嗣後應回避者仍照例回避又奏請將長善改用京
職批總理衙門辦理俱係外國事務自與別衙門不同然格於成

例若所請必允則各衙門必將效尤長善既熟悉情形所請改就京職尙屬可行長善著仍畱二品頂帶以本旗參領遇缺卽補若再行瀆請斷難格外恩施○命署倉場侍郎崇綸武備院卿恆祺爲總理各國事務衙門幫辦大臣○予山東陣亡知府陳介眉等祭葬世職○乙巳諭內閣義道等奏遵旨審擬已革大員罪名一摺已革江南河道總督庚長於捻匪竄撲清江輒退入淮城以致清江失陷該王大臣等擬以斬監候秋後處決實屬罪有應得惟念庚長於清江失陷後尙能會同克復著從寬發往新疆效力贖罪○諭軍機大臣等前據綿性奏請將私徵錢文改充公用等情當交常清等查明有無流弊據實具奏茲據常清等奏遵旨擬將改徵回賦事宜揀員赴阿克蘇查訪明確再行覈議等語綿性私設鹽課並向安集延外夷收要鹽錢經英蘊奏參曾諭令常清等

查明參奏該將軍等以綿性所奏礙難懸揣派貴文前往會商不知國家撫馭回疆輕徭薄賦裁禁陋規所以安回眾之心若以軍餉不足輒欲更張成法將私徵改爲公用實不足以示大方常清等於此事未能確有把握何得派員與綿性會商致有遷就含混之弊著仍遵前旨將私徵改爲公用有無流弊據實奏聞並將英蘊所奏綿性各款逐一詳查具奏不得稍有徇隱將此諭令知之

○僧格林沁西凌阿國瑞奏據副都統德楞額稟報捻逆竄至濰縣境內我軍跟蹤追至鳳凰山一帶與賊接仗獲勝擊斃賊匪多名擒獲二百餘名又張峙地方追殺賊匪生擒三名訊據供稱該逆挑出馬步賊匪督後以防我軍追殺其餘大股欲竄諸城等語當經飛飭該副都統實力追剿復據稟報該逆由蘭山竄至運河北岸見擬設法剿辦至後股逆匪前於東平盤踞十餘日經我軍

連日截殺全股東竄行營翼長舒通額帶領馬步兵勇卽日跟蹤追剿該逆到處不敢盤踞見已竄至滕縣迤南查其形勢欲由韓莊一路竄回老巢經臣等飭令舒通額等相機追剿毋任蔓延鄒縣教匪因知我軍分路剿擒該逆乘虛蠢動結隊出山擾及鄉村州縣臣等飭令已革濟東道黃良楷帶領練勇前往鄒縣扼紮以杜出竄一俟後股擒匪出境卽飭舒通額等帶兵會合進剿至費縣幅匪大半皆係無業貧民乘間竊發情形尙不甚重俟德楞額等一軍追剿前股擒匪竄出東境卽可就近殲除惟曹屬土匪勾結難民由羅家河口搶船北竄見由觀城縣竄撲清豐一帶又兼莘縣教匪肆擾均應及早殲除以清直省門戶第臣等所統之兵除前後派往剿辦擒匪見在存營官兵無多不敷分撥查前經奏調歸化城馬隊五百名計期將抵東境臣等見已札飭東昌府知

府秦際隆就近截留歸化城馬隊並飭帶兵官烏爾根札布速赴東昌會合進剿以扼北竄復札飭直隸大順廣道聯捷一體督兵會剿以杜蔓延奏入報聞○丁未諭軍機大臣等克興阿等奏剿匪獲勝並生擒匪首正法各摺片匪首李瀉淦被獲正法並據供匪首劉猪業於桃花園接仗時受傷身死其餘黨與當不難卽時撲滅惟既據供稱有與義州官軍接仗傷過官兵數十名之語深恐其意圖竄逸復致蔓延著克興阿成明督率將士進攻鳳凰山老巢務將要路堵截盡殲醜類並知照盛京官兵於山東面一帶合力夾擊勿令乘閒逃竄其蒙古地方並著克興阿等知照該盟長一體嚴密堵剿搜捕餘匪毋令一名漏網另片奏兵餉不敷請飭撥解等語已諭知春佑於熱河道庫內撥銀二萬兩派員解往應用矣官軍連獲勝仗生擒首犯賊勢已蹙該副都統卽宜乘勝

進攻迅速賊事以節經費將此由六百里諭令知之○戊申諭軍機大臣等克興阿等奏進攻賊巢並追剿情形一摺官兵進攻鳳凰山賊巢該匪已由南天門山口逃竄賊眾尙有五六百人若不趕緊兜捕恐其四路逃散致畱餘孽况賊匪李鳳淦雖已拏獲尙有才實善劉名得未經就擒尤恐乘間逃往錦州一帶復圖嘯聚著克興阿成明督兵迅速追捕並知會奉天官兵協同擊剿務將匪徒悉數殲擒毋令逃逸將此由六百里諭令知之○駱秉章奏臣督帶楚勇九千餘名由水路分起赴蜀二月十三日行抵安鄉接湖廣督臣官文函稱皖逆上竄黃州省城空虛促臣移軍赴鄂時臣所部前隊卽用道劉嶽昭知府黃淳熙兩軍已先後行抵宜昌當檄該二軍暫行駐紮籌酌進止及臣二十一日行次沙市黃淳熙一軍業經督臣調回臣不得不暫駐沙市審度機宜復接督

臣函稱皖賊敗竄麻城鄂垣布置周妥四川軍務喫緊仍屬臣督

師西上臣方籌換入川船隻決計進發二十七八兩日疊准督臣

函稱江西撫建被圍援兵屢挫湖北賊勢擾及黃陂孝感雲夢德

安等府縣欲臣分兵數千駐紮重慶以一軍援江一軍援鄂已與

撫臣胡林翼安徽撫臣李續宜會銜具奏等語伏念臣所部不滿

萬人斷不能分援三處查兩湖江西唇齒相依關係東南大局不

得不力圖兼顧惟四川形勢陸通秦豫水達荆淮西北畿疆之奠

東南樞算之源胥恃乎此近五六年湖北湖南餉源稍裕實收蜀

省鹽釐之利比歲滇匪擾亂鹽貨阻滯關卡無可抽收軍餉因之

告匱使臣督率所部入川又分援江鄂兵力實不能兼顧而軍無

見糧士不宿飽豈能責令枵腹荷戈欲爲兩全之謀惟有撥其半

以援江助振湘軍之氣率其半以赴蜀疏通楚餉之源庶於大局

有濟見撥劉嶽昭一軍四千六百餘人前往湖北協剿該道籍隸湖南與督臣曾國藩撫臣胡林翼均屬同鄉或鄂或江皆可歸其調遣臣仍督率黃涪熙等營卽日赴川相機進剿極知川省賊勢蔓延兵力單薄然使之會合蕭啟江舊旅保全產鹽之地或猶力所能支但使保全川東鹽源無復阻滯卽於江鄂軍務實有裨益將來布置稍定卽可添募勇丁大張撻伐萬一楚疆危迫仍可再圖援應上諭四川軍務喫緊且爲楚省餉源駁乘章見分兩軍一援江西一赴四川所籌甚屬妥協著卽督率黃涪熙等兵迅速前進會合蕭啟江舊旅將川省逆匪認真辦理毋令再肆蔓延其劉嶽昭一軍著官文胡林翼調度江鄂情形相機調遣儻賊勢稍鬆仍飭令前往四川以厚兵力至匪眾竄擾德黃等處見在曾否擊退並著官文等隨時奏報以慰廑念將此由六百里各諭令知

之○諭本日降旨令候補總兵李定太幫辦徐宿剿匪事宜徐州地方爲南北要衝見在逼近賊氛田在田勢難兼顧浙江帶兵之員尙有饒廷選張玉良等足資統率著瑞昌王有齡飭令李定太迅速繞道前赴徐州毋許稍涉遲緩致有貽誤將此由六百里諭令知之○諭前據聯捷奏匪徒擾及清豐當派兵勇往援匪眾解圍西竄仍飭遊擊吉忠阿等窮追並據常績奏捻匪逼近晉省派兵分防潞遼等處當以派防之師不過藉壯聲勢諭令該署撫派員實力勸辦團練本日據嚴樹森奏冠莘等縣土匪已由濮州過河開州清豐南樂均有匪蹤並有圖竄大名山西之說請速籌剿辦等語防河爲聯捷專責乃東省匪徒輒由濮州楊家集等處渡河迨由清豐西竄豫境擾及山西或竟至北竄大名則完善之區勢將悉被蹂躪聯捷前派遊擊吉忠阿等帶兵追擊著卽飭令確

探賊蹤實力剿擊儻兵力不敷並著添派兵勇前往會剿毋任蔓延開州清豐南樂既有匪蹤尤應趕緊殄滅著文煜嚴飭該地方文武迅速剿捕並著遵照前旨飭令正定鎮及大名鎮道酌帶官兵與東省官兵合力防剿至晉省夙稱殷富久爲匪眾窺伺該撫前派防兵深慮單薄第恐該省兵丁強壯者少自應辦理團練以資捍衛著常績派委賢員實力勸導以收眾志成城之效其大同鎮備調官兵應否卽令前往各要隘防守之處並著妥爲酌辦務期先事綢繆勿致臨時貽誤將此由六百里各諭令知之○諭田在田奏徐城布置已定仍回宿州安籌剿辦一摺逆匪王玉科等句結西捻東擾宿州情形喫重田在田自應仍回宿城藉資鎮撫惟邳州幅匪復起睢甯土匪亦欲句結濟南捻匪合竄東路蕭縣則新起股匪冀斷餉道窺伺郡城沛縣與滕嶧毗連亦恐教匪竄

授各州縣防剿均關緊要著田在田卽將各處匪徒痛加剿洗並督飭遊擊歐玉標等將盤踞虞姬墓之賊一律掃蕩並著吳棠將徐境團練趕緊整飭務令與各路官兵聯絡以壯聲勢另片奏請飭催總兵詹啟綸速到徐州本任等語詹啟綸前經都興阿奏畱揚州軍營該處防堵正當喫緊未便令其赴任本日已降旨令李定太幫辦徐宿剿匪事宜並諭令瑞昌等卽飭該員星速繞道赴徐矣將此由六百里諭令知之○以伊霖爲廣東布政使彭玉麟爲廣東按察使

由惠潮嘉道遷

○己酉諭內閣恭親王奕訢第二子著命名載滢○袁甲三奏據翁同書來函以苗練所請二事一求壽城

所殺七人之屍骸歸葬一求賜恤七人家屬所言均近情理翁同書俱已應允並許以撤退後卽爲辦案詎苗練忽翻前議別有要挾其意總因七人之死由孫家泰主使而與徐立壯結怨已深更

不能無所顧慮翁同書復派員開導似可漸就範圍乃徐立壯孫家泰自知爲苗練所不容彼此結爲腹心又因無力以敵苗練遂招引捻匪自樹羽翼所招之眾大半未經薙髮將兩河口苗練營盤攻破三座截其歸路以致議和無成而薙髮之眾進駐城內翁同書飭令薙髮紮營城外能否遵行尙無確信見雖壽城道路漸通苗練亦漸次撤動而患在蕭牆有不能不慮者且張學醇稟稱苗沛霖親筆信函以歸路已斷人眾糧少措詞頗屬倉皇其鋌而走險別生枝節尤在意中臣已切實致函翁同書屬其妥爲防範如苗沛霖別無要求卽飭令撤回老寨聽候查辦徐立壯等所招捻眾斷不可令其久居城中並由臨淮酌派精壯二百餘名爲張學醇親兵飭令會同廬鳳道才字和整齊西路團練扼守正陽兼顧三河尖毋稍疏虞適江南提督李世忠來臨稟商軍務臣已密

授機宜派撥水師礮船及該提督隨帶馬步兵勇均歸總統前赴壽正一帶相機查辦總期內患漸平外侮不擾以靖地方而甦民困上諭軍機大臣等苗練人數眾多儻致激成事端深恐難於收拾且徐立壯等所招捻眾並未薙髮遽入城中情形亦極跋扈儻能以毒制毒殲除一二較之徒事羈縻似有把握該大臣見令李世忠統帶馬步兵勇及水師礮船前往查辦仍當持平辦理使之互釋嫌怨儻該練等結仇已深不遵查辦亦惟有照此次批諭辦理但不可取一時快意致貽後來鉅患該大臣於操縱機宜諒必悉心斟酌朕亦不爲遙制將此由六百里諭令知之○袁甲三奏壽州城圍稍鬆函致翁同書並飭張學醇等分別籌辦得旨該練等結仇已深恐非查辦所能了結苗練既無歸路若令進退維谷不激而生變其誰信之莫若以毒制毒此三人中互相格鬪能

殲除一二官軍坐收其利較之敷衍羈縻似有把握○袁甲三奏
臣因團練構釁深恐南路逆賊勾結出竄疊經諄飭各練密探嚴
防隨時剿辦茲據練總軍功吳開會稟稱周圩路通廬定捻逆往
來均由周圩經過周廷彩等積慣勾匪肆行搶掠經該練會商訓
導馬太和等派練往剿累戰皆捷將賊圩攻破生擒周廷彩斬首
又據練總軍功王學喜稟稱在鳳陽山南截殺髮捻五六十人獲
馬四十餘匹又於謝家店殺髮捻十數人生擒統帶馬隊之趙汶
燦統帶步隊之左汶玉一併解營正法並偵知賊匪有與苗練勾
通情事臣設法離間見已彼此懷疑似無慮其會合且擒首孫葵
心已伏冥誅餘黨由豫回巢均經各路稟報有案擒首龔瞎子前
同粵匪犯楚行至松子關爲官軍擊敗龔逆受傷立斃疊據各州
縣稟報並拏獲生賊所供相同毫無疑義查孫逆龔逆最稱狡悍

一旦翦除眾捻頗爲解體見探張落刑困守空城窮蹙患病其黨
眾多難髮潛逃者臣俟有機可乘卽當攻其不備爲擣穴擒渠之
計報聞○予安徽陣亡知州鄭沅等祭葬世職○庚戌諭軍機大
臣等奕訢等奏佛國哥士耆聲稱見旣和好擬不俟繳款扣清先
行撤兵將粵城讓出旋由普魯斯布爾布隆將退出粵東省城照
會遞到等語英佛兩國不俟扣款繳清撤兵退出粵東省城係爲
和好起見著勞崇光耆齡卽照奕訢等所議辦理並將英佛二國
撤兵情形隨時具奏將此由五百里諭令知之○諭寄諭欽差大
臣袁甲三本日據翁同書奏苗練圍攻壽州情形危急經兵勇力
攻兩河口嚴扼正陽斷其歸路始退回下蔡等語與袁甲三所奏
徐立壯等招引捻匪先赴沫河口搶劫官民船隻爲張學醇督練
截回旋將兩河苗營攻破三座情形不甚相符苗沛霖與徐立壯

等結仇已深是以圍攻壽州雖經翁同書兵練擊退而九里溝尙有苗練四營盤踞守津要若不辨是非專攻苗練是必激而生變況徐立壯招集捻匪久居城中其患尤鉅翁同書爲羣小所惑但知苗沛霖之攻城狂悖而不思徐立壯等之假公濟私招集捻匪爲患將來著該大臣仍遵昨日硃批及寄諭悉心酌度妥速辦理不可因翁同書此奏稍涉游移翁同書原摺著鈔給閱看將此由六百里諭令知之○諭毛昶熙奏軍餉久缺立虞潰散恐誤大局瀝陳危急情形一摺據稱宋營兵勇多不得力早應嚴加裁汰止以無餉之故遲延至今擬俟嚴樹森到營會商妥辦乃撫臣查無出省定期而欠解餉項已至十餘萬兩見在南陽汝甯等處勦辦正當喫緊餉需甚亟郡城拮据殆盡潰散堪虞各等語歸德兵勇係慶廉移交毛昶熙統帶其中獷悍及疲輟者原應裁汰抽換勁

旅但欠餉既多未能驟辦亦係實在情形該撫前奏宋營兵勇多
湊雜之流擬俟毛昶熙將各隊花名清冊送到卽派幹員前去點
驗分別裁撤惟委員裁汰兵勇尙恐難期覈實嚴樹森見在督辦
剿匪事宜著親赴歸德軍營會同毛昶熙認真裁汰務令悉成勁
旅並將歸德一帶防剿機宜和衷商榷布置稍定再回省城其應
需軍餉並著籌款撥解毋得遲延儻各存意見動輒齟齬設兵勇
因餉缺譁潰句結搶匪肆竄該撫身任封疆豈能委罪於毛昶熙
耶毛昶熙經朕簡派督辦河南團練復令幫辦剿匪事宜應如何
振刷精神維持大局乃因餉需欠缺巡撫不卽到營輒負氣奏請
撤回另賞差使亦屬非是著俟嚴樹森到營後一切軍務公同商
酌斷不可各懷私見致誤事機本日據翁同書奏苗練進攻柏家
圩經官軍擊敗生擒粵逆魏德林供稱苗沛霖調粵賊七百餘人

係余姓管帶同赴下蔡並聞欲同廬逆先赴汴梁再圖壽州之說
事之有無雖未可定但不可不先事豫防並著嚴樹森毛昶熙嚴
密偵探妥爲防範毋稍大意將此由六百里各諭令知之○辛亥
諭軍機大臣等嚴樹森奏河防不固捻匪竄撲內黃縣城闌入楚
旺經兵勇往剿退回直境一摺據稱山東冠華兩縣及鄆鉅等縣
匪徒由濮州渡黃西竄該撫調彰德營參將穆特布會同彰德府
知府延齡帶領兵勇馳往楚旺堵禦嗣該匪改撲內黃縣城不克
遂分股直撲楚旺官軍迎擊失利匪眾乘勢闌入糧道張昀參將
穆特布退回彰德郡城等語穆特布經嚴樹森派赴楚旺自應嚴
密堵截何以賊匪來撲輒退回郡城有無遷延不進捏報受傷情
弊張昀是否畏葸逃遁著嚴樹森確切查明據實參奏楚旺漕次
正當開兌之際如有損失卽著該撫與該糧道按數賠補無誤兌

期見在該匪向清豐開濮一帶逃竄難保不再萌窺伺仍著嚴樹森嚴飭總兵牛浩然等督率兵勇奮力剿洗毋畱餘孽將此由六百里諭令知之○河南巡撫嚴樹森奏據汝甯府及汝陽縣稟報擒匪陳大禧等糾眾萬餘人圍撲東關寨堡並直攻汝郡北門該府祁之銓會同候補知府廖慶謀通判張桐署汝陽縣知縣吳元浩等督率兵勇開放槍礮擊斃執旗賊目一名夥匪數十名生擒十一名奪獲雲梯十八架賊勢卻退兵勇追剿復斃十餘名生擒二名賊見北面防守甚嚴卽合大股力攻東關寨堡梟濠而過參將柏英等督率兵勇開放槍礮轟斃甚多其越重濠者經官軍斬石齊施傷斃多名先後斃匪不下三百餘名內有著名擒首史狗娃李萬舉二名先後共奪雲梯一百餘架刀械旗幟無算逆眾見仍退踞范寨陳寨等處並據新蔡縣稟報該縣西北接連汝境數

十里徧地賊蹤揚言不日來攻新蔡縣城等情臣查該匪陳大瀉等膽敢圍攻郡城雖經該府祁之銓等擊退然糾脅已有萬餘占踞數寨勢甚披猖當卽飛飭遊擊王天保余萬明等督率所部會同該府文武奮力截剿臬司鄭元善業於十四日出省仍飭先其所急星馳抵汝督率剿辦惟刻下汝蔡情形萬緊而兵勇不滿三千將亦不敷調遣查候補道張曜歷在汝光剿匪戰績夙著見在西南竄匪已由楚境回竄裕葉等處勢將循舊路回巢不得已權衡輕重改派遊擊保英統帶成景之軍躡蹤追剿飭令張曜迅赴汝陽會同臬司調度諸軍妥速剿辦俟將西南竄匪偪令出境後並飭保英帶領此起兵勇亦赴汝甯仍歸張曜統帶以厚兵力報聞○命前任大學士彭蘊章署兵部尙書○署湖南巡撫翟誥奏石逆分股在江永等處經我軍擊退竄往粵東連山境地復爲該

處團勇所截二月二十三等日仍回竄泥村馬頭鋪同知魏喻義等親率所部馳往迎剿殺長髮賊十餘名賊退踞粵東之西嶺二十五日魏喻義督勇追擊槍礮齊施賊勢不支卽紛紛敗潰二十八日該逆冒雨偷竄宜章屬之李家村歐家村等處同知楊安臣等分路截殺斃前鋒悍賊數十名賊始退卻我軍乘勝追殺十餘里陣斬騎賊四百餘名步賊二千餘名生擒長髮賊四十八名均於軍前正法魏喻義駐軍上江圩偵知該逆將由牛市偷遁遂督勇疾馳攔截而賊之前鋒已至見我軍扼要駐守復奔回太坪圩屯聚栗源堡二十九日魏喻義等率所部直逼栗源堡適該逆齊向武陽司蟻附爭渡我軍四路截擊溺斃甚多餘匪悉入堡死守時知府席寶田等踵至聲勢益壯三十日我軍乘勝攻入徧諭投誠免死賊目僞統戎紀漳生等率眾四千餘人棄械乞降收繳

羸馬三百餘匹偽印三十五顆偽照旗械無數其已渡武陽者魏
喻義派員協同投誠賊目紀漳生宣示德意招安五千餘人楚境
漸次肅清報聞○癸丑諭軍機大臣等成明奏追剿賊匪獲勝並
擬令熱河等兵暫駐朝陽請飭福厚接濟軍餉各等語賊匪竄至
廣甯縣大牛圈地方經成明督帶追剿獲勝盛京協領書明額帶
馬步隊九百名趕到業經會合進剿惟賊匪東竄恐擾及盛京各
屬本日已諭知玉明嚴飭所派官兵合剿克興阿見在行抵何處
著卽與成明督飭各軍實力剿捕毋任再有竄逸熱河步兵三百
名西安步兵五百名旣據成明請令暫紮朝陽候調著卽照議辦
理前因克興阿等請撥餉需諭令春佑於熱河道庫撥銀二萬兩
解往據成明奏稱見在兵丁口分有欠至十數日者著傳諭福厚
趕緊放給並飛速撥送前途追賊官兵以資接濟將此由六百里

諭知克興阿成明並傳諭福厚知之○諭成明奏追剿賊匪獲勝情形一摺據稱朝陽賊匪由鳳凰山向東北逃逸經成明督兵追至奉天廣甯縣屬之大牛圈地方連夜進攻斃賊二百餘名餘匪乘夜逃竄成明見追至趙家屯地方盛京協領書明額等管帶馬步隊業經趕到該總兵已派常陞及書明額等督兵先行跟追並咨玉明豫行籌防等語玉明前經續派步隊五百名馳赴錦甯廣義一帶堵剿見在賊匪東竄著玉明嚴飭前派官兵扼要堵截如兵力不敷卽速行添調官兵會同克興阿成明所派官兵前往夾擊其東南一帶並著迅飭牛莊防守尉海城縣知縣等協力堵禦務期聚而殲旃毋令一名漏網將此由六百里諭令知之○甲寅諭軍機大臣等本日據玉明等奏請飭蒙古各王旗派兵協剿朝陽賊匪等語官軍攻破鳳凰山賊巢該匪竄至奉天廣甯縣屬之

大牛圈地方被官兵打敗逃竄見在西南兩面均有兵堵截惟東北一帶與蒙古各王旗部落相連恐該匪竄入著理藩院傳諭蒙古各王旗一體派兵協同堵剿毋令逃竄並將屬下人等嚴加約束毋得窩藏容留及勾結爲匪以期盡殲醜類一律肅清將此諭令知之○諭辭煥奏浙省海鹽平湖乍浦失守見派兵勇防剿一摺據稱海鹽縣城於二月二十七日失守經蘇省援師會同浙師克復續有金陵逆匪數萬從蘇常竄踞嘉興嘉善復於三月初八日竄入海鹽乍浦平湖均於初九日失陷副都統錫齡阿前總兵米興朝均不知下落等語平湖乍浦逼近金山且與奉賢等廳縣壤地相接一經失陷則松江震動杭州省城北路亦形喫緊更恐窺伺浙東擾及完善地方辭煥見已與提督曾秉忠籌撥兵勇並收集浙省潰兵嚴扼金山要隘著卽督飭將士約會浙師夾攻平

湖乍浦以圖克復並著瑞昌王有齡迅撥勁旅會合攻剿毋任久
踞更須派兵進攻海鹽之賊以固浙東門戶錫齡阿米興朝並海
鹽平湖乍浦文武各員下落均著瑞昌等查明具奏將此由六百
里各諭令知之○丙辰諭內閣劉長佑奏土匪闖入太平府並養
利州城請將遇害及失事之地方文武分別議敘革留一摺上年
八月間南甯州土匪襲陷太平府城復由安平等處撲犯養利州
代理知州吳章湘等督帶壯練在大嶺墟迎擊斃賊數百逆首吳
淩雲另遣股匪於十月二十九日乘夜繞路撲入州城吳章湘等
回援力戰身受多傷匪黨淩光澈等分竄上思州經該處團練黃
文清等圍剿殲斃淩光澈著劉長佑卽飭帶兵各員迅圖克復毋
令久踞知府銜署太平府知府龍州同知劉作肅著交部照知府
陣亡例議敘並著該府將劉作肅妻女姓氏及次子劉家鳳查明

奏請旌表署新泰協副將揀發參將多祿上思營千總黃耀麟李
爲樑被戕情形並左州學正蔣應奎四隆州州同馮應鏞及其餘
員弁下落均著劉長佑查明具奏代理養利州知州吳章湘把總
劉萬雄均著革職暫畱本任責令戴罪自效儻再不知奮勉卽著
從嚴參辦○諭軍機大臣等前因徐之銘奏滇省軍務緊要請畱
張亮基在任調理當經諭令張亮基暫畱本任督辦雲南軍務並
諭令妥議撫回事宜茲據張亮基奏病難速痊懇俟調理就愈卽
行赴滇等語滇省回務因徐之銘辦理乖方致難蒞事前已諭令
新任雲貴總督劉源灝迅速赴滇查辦張亮基見在患病著准其
在湖北宜昌一帶就醫俟調理稍愈卽行馳回滇省幫同劉源灝
辦理安撫回眾事宜將此由五百里諭令知之○諭樂斌奏撤匪
滋事請飭山西陝西迅撥欠餉等語近年甘肅協餉各省欠解過

多該省設法籌湊已屬支絀見在西甯府屬撤回滋事兵餉更難
延緩著常績瑛榮速飭各該藩司將欠解甘餉先行各籌撥銀十
萬兩解赴甘肅以資接濟其餘欠解銀兩仍著陸續籌撥毋稍遲
誤將此由六百里各諭令知之○諭僧格林沁奏通籌南北大局
密陳袁甲三奏參苗沛霖各摺片據稱苗沛霖屢著戰功近與孫
家泰尋釁仇殺實因壽州民團擅殺苗練袁甲三奏參苗沛霖妄
懷反側並不統籌全局請將袁甲三撤回將兵權移於苗沛霖等
語苗沛霖與徐立壯孫家泰仇殺圍撲壽州疊諭袁甲三派員秉
公查辦近據袁甲三奏壽州城圍稍鬆見派提督李世忠前赴壽
州一帶相機查辦苗沛霖恃強跋扈袁甲三尙欲設法羈縻諒不
至激而生變臨淮爲南北要衝防剿正當喫緊袁甲三未便撤回
致有貽誤苗沛霖不候查辦輒圍攻壽州若再與以兵權恐愈形

橫恣以後難於駕馭俟袁甲三查辦苗沛霖與孫家泰等仇殺一案完竣再行酌奪辦理前股逆匪已回老巢後股尙在滕縣盤踞並有土匪幅匪教匪滋事急宜迅速殲除以靖地方前有旨令勝保馳往景州德州一帶辦理防剿事宜以壯北路聲勢該大臣惟當嚴飭各營將士痛加剿洗毋任蔓延將此由六百里諭令知之○諭勝保奏統籌畿輔大局請撤回古北口兵勇並請飭孫治防河及田在田辦理山東團練各等語朝陽業經克復所有前調赴古北口駐紮兵勇一千名卽著勝保撤回歸該大臣調遣山東省范縣至齊河一帶河防極關緊要惟孫治係直隸道員兼辦東省防務深恐呼應不靈本日已諭知譚廷襄派員辦理矣至東省築寨辦團諸事前經諭令譚廷襄籌辦該撫見已到省自可次第舉行袁甲三因臨淮緊要一時未能赴徐田在田督辦徐宿剿匪事

宜前據該總兵奏宿州情形喫緊邳州睢甯蕭縣等處匪徒同時並起已諭令該總兵痛加勦洗若令其回籍帶團助勦則徐宿一帶勢必空虛勝保請以田在田幫辦須俟袁甲三到徐後酌量情形再降諭旨將此由六百里諭令知之○諭勝保奏請將天津道孫治兼辦山東防河事宜等語山東防河自范縣至齊河均與直境毗連自應嚴扼防守俾免疏虞惟孫治以直隸道員越境辦理恐呼應不靈著譚廷襄迅派明幹大員辦理山東境內一帶防河事務並飭派出之員親歷巡查激勵鄉團互相保衛儻所派之員疏於防範致有匪徒竄越卽著譚廷襄據實參奏將此由六百里諭令知之○僧格林沁西凌阿國瑞奏據副都統德楞額報稱捻逆盤踞安邱經我軍連日攻擊該逆不敢久踞於二月二十九日全股退出城外旋向正南一帶分竄德楞額一面飭令李麟遇由

西路向下坡地方躡蹤前進一面會同道員明新由馬市地方分投跟追三十日行至小汶河北岸瞥見南岸捻逆馬步萬餘人向前奔馳遂督兵追襲擊斃不計其數乘勝追殺三十餘里斃賊甚眾該逆此次被我軍痛剿不敢任意盤踞見已搶過運河竄回老巢至後股捻匪由東平州悉數東竄_臣等深恐該逆仍竄泰安一路與前股會合當飭舒通額等督帶馬步各隊跟蹤追剿以遏撲竄泰安之路泰安等處民團防範亦嚴該捻遂向曲阜兗州一路竄擾此時仍在滕縣盤踞_臣等已飛飭德楞額星夜帶領兵勇馳赴滕縣並由鄒縣調回黃良楷練勇二千名飭令前往助剿日內均可到滕一俟大兵雲集卽督飭各營將領合力剿除至曹屬匪徒渡河闌入館陶陽穀冠縣復與莘縣教匪勾結勢甚鴟張_臣等派歸化城馬隊五百名見已由齊河折回行抵東昌明新亦帶領

步隊趕到惟河北界臨直境必須及時剿辦一俟後股擒匪出境
臣等仍抽撥官兵前往助剿再自擒匪竄擾東境以來各處土教
幅梟匪徒狡焉思逞雖經隨時剿撫而此伏彼起頭緒紛繁前據
汶上縣稟報該縣境內張家樓地方亦有教匪聚眾滋事臣等當
派撥馬步交趙康侯等督帶馳赴張家樓將教匪侯日賢等數名
全行拏獲見在嚴行審訊儻能訊明黨與即可派兵往拏以清內
患報聞○官文胡林翼奏豫省擒匪自二月初旬焚掠賒旗店唐
縣桐柏縣等處近逼楚疆臣等以襄郡爲中原重鎮守禦尤關緊
要咨行署提臣顏朝斌安襄鄖荆道達鏞襄陽府知府啟芳將郡
城防守事宜督率文武員弁妥籌布置一面酌募勇丁駐守要隘
分撥礮船於襄河上下按段梭巡而擒匪志在飽掠襄郡之樊城
與光化縣屬之老河口經該道府等示諭居民商賈先期將貨物

遷避嗣探該匪自犯唐縣桐柏後裏脅日眾步賊不下二三萬馬賊數千二月十七八日該匪先由新野鄧州竄至襄陽之黑龍集辭家集等處窺伺樊城均經防兵擊退十九日該匪萬餘直撲河口賊見商民逃避一空無可擄掠縱火焚燒房屋過半適管帶礮船之補用縣丞周有全駛至揮兵登岸轟擊光化縣知縣吉臨亦督帶壯勇分路進攻傷斃紅衣賊數十名奪獲器械多件賊勢稍卻而該匪恃其人眾盤踞河口趕築土城爲負隅計顏朝斌等當令遊擊趙鴻舉等各率馬步由辭家集前進又令訓導陶允中等督帶勇丁分路馳進一由東路譚家湖一由西北路克浪河而以團勇伏於東北十五里之楊樹灣又委同知喬雲苓招募鹽勇三百名並會同知縣吉臨等所帶兵勇由西南兩路繼進又令吳佑棠帶領壯勇由仙人渡迎戰二十四日各軍齊抵河口會攻賊卡

開放槍礮拋擲火彈揮軍接戰賊眾分路抵拒陶允中喬雲苓等
潛令勇丁繞出賊後躍入土城大呼殺賊惟時水師周有全等一
齊登岸直入賊卡會合各軍斃匪共六七百名生擒八十二名奪
獲賊馬十餘匹旗械無數賊眾自相踐踏向東北奪路狂奔我軍
跟蹤追剿適穀城縣知縣陳五典等帶勇鈔截沿途夾擊斃匪百
餘名生擒三十七名正法敗匪至楊樹灣又遇伏勇奮起斃賊不
少追至竹林橋數十里外河南地界匪黨旋即潰散當將河口賊
壘土城一律毀平見在襄樊防堵已臻穩固河口境地肅清臣等
仍飭該文武督屬巡防按捕匪黨以靖地方又奏再臣等前聞老
河口之警當飭上游連界之鄖陽鎮將府縣一體籌防嗣據署鄖
陽鎮總兵訥欽等稟報探悉老河口敗匪圖竄浙川廳屬之李官
橋距鄖城僅百數十里當即派遊擊劉廷麟等率同團勇馳往迎

剿馬賊數百步賊數千由李官橋上犯我軍出其不意伏路掩擊斃賊數十名該匪紛紛潰退竄向東北鄧州內鄉各路而去見在鄧郡民心固結地方安堵如常等情查鄧陽郡爲上游重鎮山路紛歧多與豫境接壤邇值捻匪肆擾尤應先事防維臣仍諄飭該鎮等講求戰守有備無患以固邊疆報聞○署湖南巡撫瞿誥奏石逆分股由道州屬之蔣家嶺竄至高明鋪屯踞二月初四日知府席寶田等各帶所部及知州王必迪練勇分路進剿該逆列隊抗拒適各路伏兵並出賊眾驚潰我軍跟蹤疾追斃殿後悍賊百餘名餘賊向永明大路竄走旋聞該逆前隊將趙白芒營市十五日道員江忠義與席寶田由中右兩路進副將周達武王永章由左路進賊見我軍大隊突至拌死抵禦各勇爭先陷陣賊知不敵奔過西河江忠義等兩面夾攻落水死者無數窮追至東塘又斃

尾賊百餘名賊攀登句挂嶺竄逸查由句挂嶺外東可入廣東連
州陽山亦可入湖南藍山臨武臣已飭魏喻義等嚴遏臨武要路
令周達武防守藍山並派劉培元督率師船由耒河上駛以扼旁
竄之路報聞○丁巳諭軍機大臣等文煜奏俄國商人呢爾丕依
旺帶領跟役十八名喇嘛二十四名並駝馬車輛等於本月十九
日抵獨石口經地方文武等據理阻止該商已遵允改道所攜貨
物亦據固理聲稱有令於途間零星銷售之語著文煜春佑嚴飭
各該地方官如俄商行抵該處准其將零星貨物銷售不設行棧
並曉諭居民與該商公平交易將此由五百里各諭令知之○戊
午內閣欽奉 硃諭軍報稽延未有近來之甚者前於二十八日
一時之內連到十二處昨日戌正後數刻內又到十一處雖朕披
覽不覺過勞然事非一省頭緒紛繁豈能纖細無遺不知在何處

逗畱可惡已極著兵部嚴飭迅速查明究在何處積壓何處遲滯
卽將該督撫臬司等分別輕重請旨嚴懲以儆將來不准以一行
文了事辦如不辦該督撫臬司等平日玩泄從事積習已深經朕
此次嚴諭後若仍漫不經心則是自貽伊戚無足顧惜○諭內閣
袁甲三奏弁兵圖害主將句匪襲營派兵擊退一摺山西蒲州協
副將格洪額帶兵駐紮安徽盱眙地方兵丁方保幘因被責懷恨
圖害主將復敢勾結蔣家集賊匪潛襲營盤以致格洪額遇害見
經袁甲三派兵截擊斬獲殆盡其竄赴蔣壩之賊亦經官軍擊退
地方一律肅清格洪額激變兵丁是否另有別情首犯方保幘屍
身未獲所稱殲斃有無捏飾其同謀投賊之把總李松山等四名
並尚未回營之文武員弁下落均著袁甲三詳悉查明毋稍含混
○官文胡林翼奏逆首陳玉城及捻首龔瞎子統帶髮捻五萬餘

人分擾羅田之松子關經副將成大吉飭令都司曾昭仕遊擊胡以章副將張運馥等分路迎擊正酣戰閒成大吉暗令參將王名滔從山腰截擊賊眾驚潰狂奔墜巖挂木自相蹈藉死者三千餘人餘賊亦被曾昭仕等帶眾奮殺斃賊千餘名該逆旋分五路來犯成大吉卽派營弁分路抵禦而自率兵勇從近壘偃旗突出力戰多時賊復敗退追殺數百名據生擒賊供前被官軍殺斃騎馬賊目卽龔瞎子而賊眾尙多復率全隊由山路排牆而進成大吉卽飭各營迎頭奮擊賊勢大敗我軍乘勝追殺至關外七八里之觀音堂始行收隊該逆全數從松子關外竄逃旋據探報擒黨因龔瞎子死散去二三萬人從舒廬仍歸定遠髮逆亦散去數千尙餘三四千人繞道竄入英山羅田交界臣查成大吉等駐松子關以少勝多屢戰皆捷並剿除擒首厥功甚偉惟副將余際昌以七

營分布霍山之三石嶺樂兒嶺等處駐守三石嶺之三營尙能自保而駐守樂兒嶺之楊飛熊浦本祥李殿元等營同時潰散賊眾一擁而入直走英山遂乘虛竄陷黃州謹將應獎應參各員先行開列請旨分別功罪以示懲勸 上諭粵逆捻逆竄擾湖北羅田松子關經副將成大吉等分路進剿斃賊四千餘名連日賊分五路來犯復經官軍痛剿殺斃捻首龔瞎子並伏兵追擊餘逆從關外逃竄副將成大吉等以少擊眾殲除大憝厥功甚偉副將余際昌等分防霍山不能堅守待援致令逆匪闖入黃州自應分別功罪以示勸懲記名總兵副將成大吉著賞加提督銜副將張運馥保升副將參將王名滔胡以章均著賞加總兵銜保升遊擊都司曾昭仕著免補遊擊以參將儘先補用副將余際昌參將楊飛熊都司浦本祥李殿元均著革職畱於軍營效力以觀後效○官文

胡林翼李續宜奏皖逆自踞黃州後分黨數萬竄擾麻城黃安黃
陂孝感雲夢德安隨州等屬三月初一日臣續宜派道員金國琛
等率湘勇七千餘人進攻孝感彭玉麟率都司王吉等帶師船駛
入該縣城河舒保督帶馬隊往來策應初三日王吉率礮船至城
河賊出大隊抗拒我師開放槍礮斃賊目一名眾賊敗退各哨官
直前奮擊燒賊船數十號斃賊二三百人初九日水陸兵勇四面
進攻將東西賊壘踏平擒斬悍逆數十名賊眾慌亂我軍緣城而
入當將孝感縣城克復計斃賊匪四千餘名生擒五百餘名臣官
文前於雲夢應城被賊竄擾卽調遊擊王允昌等馳往襄河潰口
一帶剿辦竄逆兼爲孝感各軍聲援嗣雲夢縣知縣吉棟督團會
同水陸兵勇於三月初七日將縣城先自收復署應城縣知縣艾
錕於逆匪闖入縣城卽招集勁勇擊退賊未踞擾黃陂黃安之賊

經各該縣知縣督團攻剿擒斬多名二城均卽收復其麻城縣城經知府梁作楫一軍督同麻城縣知縣吳林固守三月初四日賊眾萬餘由英霍繞路來撲參將劉中和奮勇出隊力戰陣亡嗣梁作楫等調集兵勇內外夾攻殺賊三百餘名敗賊潰竄立解城圍此次水陸各軍奮力痛剿實足寒逆膽而快人心都司王吉可否賞加勇號道員金國琛可否賞加按察使銜此外出力文武員弁人等容臣等查明擇尤酌保麻城陣亡之參將劉中和懇飭部從優議卹以慰忠魂 上諭此次官軍剿辦皖逆連獲勝仗克復孝感等屬及麻城解圍勦辦尙屬得手都司王吉著賞給猛勇巴圖魯名號道員金國琛著賞加按察使銜在事出力員弁著官文等擇尤酌保陣亡參將劉中和著交部從優議卹○諭軍機大臣等本日據瑞昌奏浙省軍餉月需四十餘萬本年僅閩省解到援軍

餉銀三萬兩此外協餉毫無消息江西省非但協餉欠解卽浙省代墊援軍餉銀亦未解還並據王有齡奏浙省餉需匱乏省外各防屢有索餉譁譟之事省防士卒飢寒交迫甯紹等處收成歉薄錢糧徵解無多釐捐亦幾絕望專盼協餉接濟請飭湖北湖南廣東江西福建等省速將部撥協餉如數籌撥各等語浙江嘉興府城未復杭湖嚴各屬均有匪蹤設因軍餉不繼致寇氛日益蔓延於東南大局殊有關繫著官文胡林翼文格勞崇光耆齡慶端瑞瑣毓科將部撥浙省協餉迅速如數籌撥派委妥員剋日起解毋許遲誤江西省應歸浙省墊發援軍餉銀十餘萬兩並著毓科速行籌解歸款再據田興恕奏稱湖南協黔項下每月應解該提督軍餉銀二萬兩自上年四月以來並未撥解該官兵應領月餉業經停支數月萬難支持等語著文格將欠解田興恕軍餉速行撥

解以清舊欠嗣後仍按月撥銀二萬兩以資接濟毋得稍涉推諉將此由六百里各諭令知之○諭王有齡奏賊匪出沒於皖南江浙之間以婺源爲咽喉要路請飭曾國藩酌增勁旅統以名將分駐婺城俾浙東江西道途無梗商販自通得以抽釐濟餉兩省均有裨益等語婺源爲江浙皖南之要若能厚集兵力屹爲重鎮可以固衢嚴廣信之防卽祁門軍營亦可杜賊匪窺伺著曾國藩酌量見在情形調撥得力兵勇前往婺源駐紮以爲江西浙江聲援將此由六百里諭令知之○諭本日據官文胡林翼奏湖北兵力不敷剿辦暫難分撥並據李續宜奏督兵追剿逆匪勢難兼顧壽州各一摺逆匪竄陷黃州武漢震動省垣存兵無多見在孝感各縣雖已克復而竄踞黃州之賊亟須厚集兵力四面圍攻官文等奏稱湖北兵勇不敷分剿若再勉強抽撥恐愈形單薄貽誤事機

自係實在情形所有前此諭令該督等調撥精兵二千名赴三河尖駐紮之處卽著暫緩調遣李續宜業已統兵回援湖北壽州籌辦事宜自難兼顧卽著該撫督飭各路官兵規復黃州毋任久踞並將德安一帶賊匪奮力截擊毋任西竄俟鄂省軍務稍平再赴新任袁甲三在臨淮未能兼顧壽州前已令賈臻暫行署理安徽巡撫並令其駐紮潁州至苗沛霖與徐立壯孫家泰仇殺一案已疊次諭令袁甲三妥爲籌辦矣將此由六百里諭令知之○袁甲三奏查苗練兩河口營盤爲壽州兵練攻毀後其情頗覺倉皇而其心更懷叵測恐壽軍截其歸路遂卽併力退撤據翁同書稱壽軍以全力乘之該練由兩河口泅水而濟其五里廟兩營亦經力攻遁去惟九里溝四營拒守如故尙須設法環攻並言獲賊供稱苗練隊中實有廬州長髮七百餘人復據臣密探報稱苗沛霖撤

回老寨偃卧兩日頗似悔悟而下蔡實有長髮或云六七百人或云三四百人豎有太平天國旗號復又廣招練眾至楊村會話恐將與潁阜團練爲難以遂其西趨搶掠之計查西路團練誓不從苗前經臣批示嘉獎人心頗爲鼓舞見又飛飭臬司張學醇速赴潁郡會同廬鳳道才宇和嚴密布置可無虞其煽惑仍派知縣姚德賓等帶練駐守沫河以固水路門戶至李世忠水陸馬步隊伍均已齊備不日卽當就道當此軍情朝夕變換操縱遲速殊難豫必惟有遵旨妥辦斷不敢輕進貪功亦不敢因循誤事報聞○署安徽巡撫賈臻奏苗練仍宜暫示羈縻得旨賈臻所奏不爲無見著軍機大臣鈔與袁甲三閱看斟酌妥辦○命前任提督傅振邦辦理山東登萊青防堵事宜翰林院編修徐昌緒辦理省城西北團練事宜○命候補四品京堂員外郎閻敬銘以按察使候補○

予浙江陣亡知縣陳籌山東陣亡訓導馮瑜等祭葬世職○是月
蜀緩福建汀州邵武二府被擾各區本年額賦山東濟甯等二十
八州縣被災新舊額賦並雜項銀

夏四月己未朔諭內閣昨因軍報稽延諭令兵部查明係在何處
積壓遲滯卽將該督撫臬司等分別輕重請旨嚴懲本日據穆蔭
等奏遵查軍報積延時刻開單請飭查辦等語各省摺報均應按
限馳遞乃據穆蔭等查開三月二十七二十九兩日各處奏報有
遲至數日始到者甚至有遲至三十餘日始到者其東直門腰站
遞到至熱河時刻據稱亦有遲誤似此任意耽延殊屬不成事體
所有遲延軍報之本省及經過地方之督撫臬司等著該部查取
職名分別輕重從嚴參奏並著勒限一箇月令各該督撫臬司等
查明積壓遲延之地方官嚴參懲辦如逾限不行查覆卽著該部

將該督撫臬司等指名嚴參其東直門腰站顯有積壓情弊順天府兼尹張祥河府尹董醇著先行交部嚴加議處○諭據嚴樹森奏勦辦汝甯捻匪情形一摺捻首陳大禧等圍攻汝甯經官軍擊退竄踞范寨等處攻破汝南埠經候補道張曜等帶隊往勦連戰皆捷賊分路來撲廖慶謀等督兵壓退賊環攻王圩復經張曜帶隊馳救賊始東竄著嚴樹森嚴飭鄭元善張曜等迅將該匪殲除毋任蔓延○諭前因慶廉賈臻互相參奏降旨將該員等撤任交嚴樹森秉公研訊嗣據嚴樹森覆奏以賈臻徵收錢糧尙非擅改舊章貽誤軍餉係因庫款支絀候補知縣張紹英與賈臻雖係姻親例不同避幕友周注查無貪黷情弊惟曾爲賈臻屬員致招物議等語復諭令將該員等原參各條逐款查明再降諭旨茲據奏稱慶廉自奉旨督辦勦匪後僅提過賞勇銀兩數目相符賈臻因

餉銀解足尙有缺欠勇糧疑慶廉有入己情事歸德傷亡員弁節
經慶廉奏請卹典幕友余霽於查辦後卽移出撫署已據實具奏
並無欺罔所參詞斥首縣借公記過亦無證據其慶廉之子候選
道恩麟並無招搖納賄情事惟帶勇出省妄立名目有乖體制等
語慶廉與賈臻互參各款雖據嚴樹森查明均無確據惟慶廉以
巡撫大員不能正己率屬致屬員得所藉口賈臻不能與慶廉和
衷共事輒負氣參揭均有不合著一併交部議處慶廉卽著來京
聽候部議另片奏糧臺委員閔春濤呈出帳簿覈對慶廉提用賞
耗數目相符惟於勇丁口糧籠統開報積欠勇糧至一萬兩之多
殊屬蒙混河南府通判閔春濤著暫行革職勒令交出原帳確實
覈算儻查有侵蝕入己情事卽從嚴參辦如實有積欠卽著落該
員賠補以示懲儆○諭據克興阿等奏追剿竄匪斬殺淨盡一摺

朝陽匪眾自竄至廣甯縣大牛圈子被擊敗遁復竄至羅家臺地方意圖抗拒官軍奮勇進攻立斃賊匪七八十名匪勢不支乘夜狂奔成明等督兵截擊殲斃數十名奪獲槍礮旗械多件餘匪欲由白土廠門向邊外逃逸克興阿隨後趕到合兵兜剿副都統侍順復帶領馬隊沿邊搜捕經官兵並鄉社人等獲賊百餘名立時正法擒獲匪眾家屬七口贏馬車輛多件克興阿等復出邊追剿至新里屯地方並派協領常陞至兵馬路一帶搜捕匪眾業已擒斬殆盡剿辦尙屬妥速所有在事出力人員准其彙入克復朝陽案內擇尤保奏候朕施恩○諭軍機大臣等克興阿等奏朝陽竄匪業經官兵疊次攻剿擒斬殆盡據稱已將書明額所帶盛京馬隊四百名交候補協領恩合統帶在沿邊一帶搜拏餘匪自不難淨絕根株惟匪首才寶善劉名得徐洛紅均未擒獲未便任其竄

匿致令復圖嘯聚著玉明倭仁景霖侍順飭令恩合等會同各該地方文武實力按拏務須悉數擒獲儻查知該匪等或已斃命亦須搜獲屍身確鑿有據毋許空言塞責才寶善籍隸永平難保不逃往直隸境內並著文煜飭屬一體嚴緝毋任漏網所有前調官兵除盛京熱河等處馬步隊已諭令克興阿撤回歸伍外其黑龍江兵一千名駐紮建昌西安兵一千名仍紮古北口應領口糧均著由古北口糧臺給發將此由五百里各諭令知之○壬戌諭內閣據瑞昌王有齡奏官軍克復海鹽並擊退鍾埭賊匪一摺本年二月間逆匪竄陷海鹽經瑞昌等飭令已革副將張威邦等會同署江南提督曾秉忠援兵於二十九等日克復其盤踞鍾埭賊匪亦經已革總兵米興朝等沿河衝殺擊毀賊船將賊卡全行燒毀平湖境內一律肅清惟前據薛煥奏稱海鹽克復逆賊於三月初

八日復將該縣竄陷分犯乍浦副都統錫齡阿等不知下落平湖已於初九日失陷各等語此次瑞昌等所保各員除錫齡阿米興朝下落仍著該將軍等查明具奏外提督曾秉忠遊擊黃金友及其餘出力文武員弁著俟海鹽克復後覈其功罪具奏再降諭旨○諭軍機大臣等前據聯捷奏報賊匪由南樂回竄觀城派員帶兵追剿並據文煜奏上月二十五日曲周縣城被匪竄陷見催前調天津等鎮官兵星馳往援等語曲周去南樂較遠何以該匪遽能竄至抑係山東邱縣教匪就近闖入未據該署督聲敘明晰該縣地近北路豈容賊匪肆行竄擾著文煜飭令派出援兵迅速前進會同大名鎮道實力攻剿毋許遲延勝保於何日由京啟程未據奏報前據該大臣奏稱探明何路最緊卽由何路督剿自毋庸拘泥前旨專防景州一帶著卽酌量緩急或親督官軍或派兵馳

往迅將該縣城池克復並將該匪全行撲滅毋任蔓延文煜應否
出省卽著與勝保商酌辦理至聯捷防河是其專責於該匪渡黃
後擾及清豐楚旺南樂等處僅以參濮州等官了事未能迅速擊
退致該匪漸圖北犯若再遷延貽誤豈能當此重咎著卽督飭前
派兵勇會合勝保等官兵奮力勦擊肅清畿輔同知林世俊於奉
派帶勇應援不力卽著文煜嚴參治罪曲周縣同城文武有無先
行逃避並著查明具奏將此由六百里各諭令知之○癸亥諭內
閣伊精阿著充大阿哥滿洲諮達○諭軍機大臣等據都興阿奏
叛勇撲擾三河並天長六合踞匪圖犯儀揚剿辦布置情形一摺
盱眙防守副將格洪額被部下叛勇勾結逆匪戕害前經袁甲三
具奏已明降諭旨令查明有無激變各情辦理矣惟天長六合逆
匪糾合捻逆並江南安徽逆黨數萬竄至儀徵新城聯絡劉家集

等處意圖撲犯揚城雖經該將軍派總兵詹啟綸等分路進剿賊眾潰敗追殺數十里踏毀賊壘數處但該逆又有由江南糾賊復竄瓜揚之信此時防剿極關緊要其天長逆匪分股竄擾湖西擄有船隻冀圖東竄高寶一帶尤宜加意防範著都興阿黃彬嚴飭將弁分投堵剿毋使賊匪竄擾瓜揚高寶等處將此由六百里諭令知之○諭本日據聯捷奏派勇追剿濮匪偪令渡河朝城之馬老莊舍利寺兩處范縣之舊城鳳凰臺等處均有匪徒豎旗搶劫請飭譚廷襄迅撥兵勇防剿邱縣莘縣冠縣堂邑館陶臨清陽穀朝城八州縣均被賊擾官多遷避勝保見奉旨由景德進剿深恐匪徒西竄請飭令由西北兩路進攻以免擾及畿疆各等語昨因文煜奏報曲周縣被匪竄陷已諭令勝保迅速撥兵南下至朝城等屬匪徒業據譚廷襄奏明新等由堂邑進兵著卽飭令迅速前

進將邱縣冠縣莘縣踞匪剋日殲除克復城池並濮州回竄之匪及范縣朝城續起匪徒一律殄滅毋畱餘孽並嚴防濮州范縣各河口以免該匪再得渡黃肆擾至明新等所帶官兵合之士默特馬隊爲數無多應否添調兵勇助剿並著該撫斟酌辦理至地方文武遇有匪擾輒卽遷避亟應嚴加懲辦所有被擾各州縣文武地方官如有畏葸逃避情事卽著譴廷襄密速查明嚴參治罪毋稍姑息將此由六百里諭令知之○諭據賈臻奏瀝陳皖北情形請飭勝保督師皖豫一摺據稱苗沛霖藉口復仇力攻壽城近又勾結廬州髮逆屯紮下蔡自率練眾進逼正陽意圖扼長淮上流以絕壽臨兩營餉路袁甲三鞭長莫及翁同書更無從展布惟飭勝保督辦皖豫軍務駐紮潁州則歸德一郡近在腹裏無須重兵移其全力可以進剿捻巢懾服苗練等語所奏亦係實在情形惟

見在畿南地方防剿喫緊前降旨令勝保統兵赴景州德州一帶督辦非將逆匪殲除淨盡北路肅清後未能率師南下況袁甲三駐兵臨淮若勝保復督辦皖豫必致諸多掣肘賈臻見駐潁州前已有旨令署巡撫辦理苗練尋仇一事及團練招撫事宜見雖尚未接印亟應趕緊籌辦著仍遵前旨與袁甲三商酌妥辦未可專待勝保致誤事機○予山東陣亡在籍刑部司獄王淑琳等祭葬世職附祀張積功專祠並予陣亡布政司理問張知言等祭葬世職○甲子諭軍機大臣等前因曲周縣城被匪竄陷諭令勝保派兵剿辦本日據勝保奏探聞此股匪徒頗形猖獗業已派撥官兵馳赴廣平威縣等處並請調馬隊助剿等語曲周匪眾窺伺廣平莘縣等匪逼近大名元城亦形喫緊亟應速籌撲滅以靖畿輔勝保已飭正定兵八百名馳赴廣平並令伊綿阿撥兵一千前往威

縣復派候補副將成祿統帶西安馬隊三百名馳往會剿著卽飭令星夜前進會同大名廣平等處兵練奮力堵剿務將曲周縣城速行克復以免延蔓勝保應由何路督剿卽確探賊勢趨向相機前進不可專防景州德州一路以致顧此失彼所請調朝陽馬隊因該處尙須畱兵鎮守已諭令克興阿挑派黑龍江馬隊五百名取道京師前赴該大臣軍營候調著卽催提前進至該大臣前請調河南副將黃得魁練勇昨據嚴樹森奏稱黃得魁見在患病步履蹇滯所帶練勇二千名皆臨時招募並無紀律見已遣散等語已諭知該撫免其徵調矣將此由六百里諭令知之○予貴州陣亡副將毛克寬等祭葬世職○乙丑諭內閣據勝保奏提督太員族人被害請飭查辦一摺江南提督李世忠疊著戰功擢膺顯職其親族人等前經降旨准其回籍安業乃據該提督以族屬住居

安徽霍邱縣之葉家集有固始縣匪徒鄔有功等於本年三月初七日率商城固始二縣匪棍搶去該營運餉鹽竹簞四對內餉銀五千兩復於十一日將該提督族叔都司李丕戴族兄遊擊銜李昭雲二家圍搶並將本宗親戚搶掠一空不知曾否傷殘人命等詞赴勝保軍營稟訴李世忠親族在霍邱居住何以商城固始匪徒尋仇報復肆行搶掠必應嚴行究辦著嚴樹森卽派委公正大員前赴商城固始地方秉公查辦將首先滋事之鄔有功等傳案嚴訊從重懲治以儆凶頑○諭軍機大臣等據恭親王奕訢等奏接據艾林波照會及崇綸等信函呈覽布魯斯國艾林波抵津與崇綸等會晤因該侍郎等未奉有全權大臣便宜行事之旨照會奕訢等懇請代奏方能會辦通商事宜見據奕訢等於摘錄諭旨內加入全權等字卽著照所擬寄交崇綸俟艾林波索看諭旨

時給與閱看至所稱日爾曼各情能否統歸該國商辦並著悉心商酌以歸簡易將此由五百里諭令知之○陳景亮以病免以蕭浚蘭爲雲南布政使毛震壽爲四川按察使

由成綿龍茂道遷

○予江蘇

陣亡知縣洪士鏡祭葬世職○丙寅諭軍機大臣等前因王履謙奏浙東危急當經諭令王有齡派兵堵剿並諭王履謙激勵民團力顧江防並督辦勸捐事宜茲據王履謙奏稱浙省團練自歸王有齡督辦並未定有章程前派段光清赴紹辦團亦未知會其各處辦團紳士有由王有齡札委者亦有甯紹台道張景渠候補道朱琦札委者畝捐一項本係奏明專爲團練經費張景渠擅自出示停止浙東捐款又悉數解省團防經費一無可籌紹郡捐局自本年正月間經王有齡改歸地方官辦理派委張景渠及知府懷清等專辦山陰會稽戶業各捐該員等差傳捐戶按照上年捐數

以十倍加捐職員張存浩生員胡壽頤等稍事遲疑卽予管押並欲杖枷又欲將該捐戶提赴軍前充當頭陣職員李鏡人舉人陳珪等亦因威偪書捐賣田鬻產者不一而足捐戶陳穎生因差擾遷避該道等卽飭縣查封房屋並查其田畝形同籍沒催捐員弁輒持令箭拘提並縱令差役直入陳樑余俟家內室索擾城鄉大震而江防事宜仍置之不問請飭撫臣通盤籌畫酌留戶業各捐幾成以充團防經費等語浙省軍務未平籌辦團練勸諭捐輸無非爲保衛民生起見若如王履謙所奏辦理團練情形已屬雜亂無章至勸捐委員欲令捐戶照上年捐數十倍加捐並於捐戶張存浩等種種威偪肆行騷擾實堪駭異見在賊氛偪近浙東若因勸捐辦理不善致失人心必致激成內訌設有疏虞該撫豈能當此重咎所有勸捐事宜著王有齡遴委公正大員會同王履謙妥

爲勸辦不得以貪劣之員濫行充數其前派勸捐之道員張景渠等如有勒派情事卽應撤委查參不准稍有回護見在江防團練均需經費所收捐項應如何酌留數成爲浙東團防之用著王有齡通盤籌畫以免偏枯至前諭王有齡督辦團練並令王履謙幫辦原期官紳和衷以收眾志成城之效乃該撫於派委段光清赴紹辦團並不知會王履謙且辦團紳士任聽張景渠等紛紛札委是該撫全不以國務爲重尤屬不成事體所有該省團練事宜著王有齡會同王履謙妥議章程督同公正官紳認真勸辦不得任聽屬員徇私派委嘉興等處地方久稽克復儻因官紳不和以致浙東再有失事朕惟該撫是問將此由六百里加緊諭令知之○諭前因有人奏浙江巡撫王有齡新勸捐款名目恐有藉端婪索情弊降旨令張錫庚查明據實具奏尙未據該學政覆奏茲又有

人奏王有齡隨帶赴浙之江蘇道員張景渠知府孫士達知縣甘應槐或結拜師生或係該撫私親到浙未及三月王有齡輒委張景渠署甯紹台道孫士達派在瑞昌處管理文案甘應槐派營務處當差該三員品行卑鄙善於逢迎王有齡倚爲心腹遇事輒予保薦以致文武員弁奔走其門物議沸騰又有候選知府孫溍溥與王有齡有舊亦夤緣入撫署文案處與孫士達倚勢修怨紹郡紳富多被中傷以致遇有地方公事顧慮不前請飭查辦等語巡撫爲通省表率豈容任用私人致有貽誤記名浙江道員張景渠與王有齡有無拜認師生情事孫士達孫溍溥籍隸會稽何以輒派辦本省將軍巡撫文案甘應槐有無劣蹟張錫庚近在同城聞見必確著按照所參各款嚴密訪查據實具奏不准稍有徇隱原摺著鈔給閱看將此由六百里諭令知之○署漕運總督王夢齡

等奏遵查前任湖南藩司王藻勸捐辦團並無弊混並據呈稱情願捐繳錢二十萬串得旨認捐錢文著擲還仍令恪遵前旨趕緊措繳一面嚴查確據不得仍蹈姑息情面氣習若稍涉顧惜該署督運司自問當得何罪又奏盱營弁兵戕害主將句通髮逆分犯蔣壩等處見經剿滅批出力之將弁兵勇著准其暫行存記彙案請獎○丁卯諭內閣前據嚴樹森奏稱河南省河北三府捐輸請半歸防河經費半歸僧格林沁軍需嗣據聯捷奏稱河北捐項請統歸防河動用當經先後交戶部速議具奏茲據周祖培等奏稱嚴樹森係通籌全局並非置河防餉需於不顧且統轄全省呼應較靈請仍歸該撫派員經理等語河南省河北彰德衛輝懷慶三府勸捐事宜卽著嚴樹森派委妥員一手經理所收捐款除一半解歸僧格林沁軍營月餉外其餘一半悉數解交聯捷軍營作爲

防河經費務飭經手之員隨收隨解毋任遲誤並著嚴樹森督飭該員等妥爲籌辦不得苛派擾累及侵漁中飽如有此等情弊卽著聯捷隨時查明會同嚴樹森從嚴參辦該撫等務當和衷辦理毋得意存畛域再行瀆請○諭軍機大臣等據成琦等奏該侍郎於三月二十六日行抵吉林省城擬卽會同該將軍景瀄於四月初二日啟程前赴興凱湖守候俄使會勘地界勘定後圖上擬鈐用吉林將軍印信等語各國辦理事件均以奉有全權大臣便宜行事之旨爲重該侍郎等此次會同俄國公使辦理地界設該國公使以未奉有此旨不肯會勘必致屆期請旨而程途較遠往返需時應否發給上諭一道將成琦景瀄加全權便宜等字樣寄交該侍郎等於俄國公使索看諭旨時卽行宣示之處著奕訢等悉心籌酌迅速覆奏將此由五百里諭令知之○諭前據僧格林沁

奏後股捻匪尙踞滕縣派令德楞額等攻剿本日據譚廷襄奏陽南捻匪出巢計圖北竄滕縣捻匪進逼兗城儻與東昌各匪勾結畿南極爲可慮請飭勝保帶兵赴東並請於臨清德州分駐重兵各等語陽南捻匪欲圖北竄滕縣捻匪復竄至兗州之玉印村亟應迅速堵剿惟勝保前因賊陷曲周窺伺廣平莘縣等匪逼近大名已飭令鎮定兵八百名馳赴廣平並令伊綿阿撥兵一千赴威縣副將成祿帶西安馬隊三百名前往會剿此時廣平大名一帶防剿喫緊若令勝保徑赴山東必致後路空虛所關非細僧格林沁等統領重兵必須統籌全局力扼該匪北竄之路不可株守鄒縣一隅之地漫無布置本日諭令勝保督兵前進於直東邊界妥籌防剿並令文煜酌量出省督飭地方文武力遏捻匪北竄其兗州一路該大臣等惟當督飭兵勇迅速截擊勿令勾結東昌各匪

以致蔓延直境並須與譚廷襄悉心籌畫會合兵力將北竄之匪痛加勦洗以期漸就肅清至東昌各屬匪徒前據譚廷襄奏道員明新由堂邑進兵未能得手已派參將玉山等往援並添派遊擊玉秀等督兵夾擊著卽嚴飭帶兵各員迅速進兵實力攻勦儻遷延貽誤卽指名嚴參從重懲辦兗州城守及各屬防禦事宜並著飭令各該地方文武認真籌辦毋許疏失將此由六百里各諭令知之○諭本日據譚廷襄奏碭南捻逆出巢意圖北竄滕縣捻匪回竄鄒縣僧格林沁本在西關紮營退入城內登陴防守四月初二日賊至北林廠攻打民團兗州玉印村已見邊馬該處距府城甚近西至東昌北至省城均不過二三百里省城官軍調撥已空東昌一軍又爲匪徒牽掣曹州土匪遽起青州武定鹽臬滋擾其餘土匪隨處竊發請飭勝保帶兵赴山東會勦並稱臨清德州水

陸兩路均與直境毗連如臨清有兵則近徧東昌直隸南面可以
安穩德州有兵則先扼運河仍與前路聯絡一氣各等語前因賊
陷曲周已據勝保派撥正定官兵馳赴廣平並令伊綿阿撥兵千
名赴威縣副將成祿帶馬隊前往會剿見在陽南擒匪又圖北竄
若與東昌各匪勾結則畿南門戶岌岌可慮前諭勝保確探賊勢
趨向相機前進此時擒匪徧近兗州雖諭僧格林沁等力遏該匪
北竄之路第該大臣退入鄒縣城中賊勢愈形猖獗勝保雖未便
徑赴山東致北路空虛而直東邊界必須親往督辦方能得力著
卽迅速啟程探明何路緊要卽向何路督剿並嚴飭前派各官兵
迅赴廣平大名一帶剿除賊匪毋得遷延貽誤文煜前調天津官
兵一千名交大名道王榕吉統帶並著飛催前進該署督應否出
省著仍遵前旨與勝保商酌辦理臨清德州爲直隸門戶能否派

兵前往駐紮並著勝保體察情形妥籌布置將此由六百里各諭令知之○諭前據駱秉章奏統兵馳赴四川當經諭令迅速前進本日據田興恕等奏粵匪由平遠州竄至畢節縣之梓潼閣一帶該處距四川永甯縣僅三百餘里已派總兵楊巖寶等繞出賊前圍截並派都司田興發前赴雪山關助防因該處已有兵練防守卽令該都司由小壩進紮與周學桂等會剿請飭四川省速籌堵截等語粵匪窺伺川省已久見竄及畢節亟應就地撲滅以免滋蔓所派總兵楊巖寶等著卽飭令督兵前進星夜繞出賊前迎頭截擊務於畢節地方悉數殲除毋得徒事尾追任令蔓延並著崇實速飭沿邊地方文武實力堵截毋許稍有疏失如兵力不敷卽調派得力官兵速赴永甯一帶會合黔軍前後夾攻以期盡殄醜類駱秉章計已入川應否親統官軍前往南路督辦防剿抑或分

兵助剿之處著卽斟酌情形妥籌辦理將此由六百里各諭令知之○己巳曾國藩奏臣以厯口地當要隘於祁門抽兵駐防以副將沈寶成統之二月二十三日西路樺根嶺外之賊破卡而入竄至箬坑北路之賊亦破禾戌嶺而入提督江長貴由柏溪馳援尙爲得手二十五日箬坑之賊圍撲厯口約近萬人並有賊百餘扼踞石橋截我歸路我軍堅壁固守勢甚危急臣當派副將朱品隆率兵由祁門赴援賊始解圍二十六日朱品隆派同知朱聲隆等由厯口之右翻山繞出自與沈寶成等由厯口之左沿河夾擊而出以副將胡暉堂等各帶哨隊伏後接應朱聲隆等行距汪村二里許正值城匪大股前來我兵奮力擊斃黃衣悍賊數名朱品隆等將塘下陳田葉村各匪擊敗亦追抵汪村左右夾擊賊遂大潰我軍乘勝追至樺根嶺始行收隊計斃賊九百餘名生擒僞丞相

宋先詳等三十七名解散脅從以千計敗賊悉遁嶺外北路犯嶺之賊二十三日竄撲禾戌嶺卡並分犯湘源楓樹嶺等處江長貴親督遊擊王金鼎等往援適犯楓樹嶺之賊經都司馬登富等由湘源老嶺腳兩路鈔截賊遂合股直犯禾戌愈戰愈多我軍併力衝殺賊始敗退是日有股匪竄犯方千嶺我軍分路堵剿將該逆擊出嶺外二十四日賊復分犯禾戌楓樹大洪三嶺及湘源隘口江長貴派王金鼎專顧左路已革副將羅承勳專顧右路自率親軍及遊擊林耀等設伏以待迨該逆大至我軍伏兵齊出斃賊甚多其犯楓樹嶺之賊亦經遊擊江國林等擊敗惟湘源一股尤爲兇悍分三路來撲馬登富專壓右路山梁馬懷珍扼堵左路山梁守備達玉元等從中路憑卡轟擊斷其首尾斃賊無算其時都司曹貴亦由大洪嶺鈔出策應賊見我軍厚集大潰出嶺是日犯方

千嶺之賊經參將袁國祥等擊退犯釣魚嶺之賊經守備達金龍等擊退此次出力員弁應卽附於前案保獎以示鼓勵 上諭內閣逆匪竄撲西路厯口北路禾戌等嶺官軍分路截擊大勝剿辦尙屬得手著曾國藩嚴飭將士乘勝將嶺外賊匪悉數殲除毋畱餘孽此次出力員弁准其彙入前案保獎○曾國藩奏三月初二

日 臣派祁門黟縣防兵九千餘人齊赴休甯大舉攻徽 臣亦親赴休甯就近調度初四日由休甯分兩路前進西路以副將唐義訓爲主副將沈寶成同知朱聲隆輔之是夜住宿巖市街北路以道員張運蘭爲主副將婁雲慶參將楊鎮魁張應超輔之途次破潛口賊巢斬馘百餘人是夜住宿潭木地方初五日西路唐義訓等營由岩市前進行過七里亭城賊出北門搦戰各哨不俟號令衝過古虹橋賊匪佯敗我軍搶上山梁騎賊數百由右包鈔我軍前

阻堅城後隔河水不能施展適驟雨如注衣服火藥盡溼騎賊皆用洋槍乘我於危遂致挫敗副將葉光岳胡玉元力戰死之弁兵傷亡二百餘人北路張運蘭等因雨收隊各軍稍爲休息初十日再進專由北路行走十二日列隊於大里富場等處賊亦負城排隊相持竟日無隙可乘是夜唐義訓住宿槐塘張運蘭住宿大里賊於二更忽出萬餘人由西路包繞而來焚村劫營槐塘村莊首先被焚強中等營挫潰張運蘭等見前村被燒齊出村房列隊山上得以保全於次日同回休甯其祁門黟縣各軍皆回原營查徽郡之賊精悍者不過數千本可力戰攻取乃機緣不順兩次未能得手副將唐義訓初次以號令不嚴過橋輕進二次以哨探不遠被劫驚潰均難辭咎姑念平日謹慎屢著功績請與副將沈寶成均以遊擊降補同知朱聲隆請以知縣降補以示懲儆副將葉光

岳胡玉元均請交部從優議卹 上諭逆匪盤踞徽州府城經曾國藩派令副將唐義訓督隊進攻乃初次以輕進失挫迨整隊復進被賊乘夜焚村劫營以致驚潰實屬咎無可辭副將唐義訓沈寶成均著以遊擊降補同知朱聲隆著以知縣降補陣亡副將葉光岳胡玉元均著交部從優議卹○曾國藩奏僞侍王李侍賢糾合大股竄陷婺源分踞清華街左宗棠親率各軍進剿二月初二日飭老湘營等軍進紮傅村探知清華街之賊分踞石嶺嚴田一帶意圖由甲路分犯浮梁景德鎮遊擊王開琳等於初六日進紮甲路扼之甫築營壘賊已由石嶺嚴田竄至王開琳等分路進攻斃賊四五百名賊始敗走我軍乘勝力追復斬騎賊二百餘人步賊二千餘人生擒百餘人是夕賊退清華街初七日仍糾大股徑撲甲路營盤我軍奮擊卻之因賊勢過盛王開琳等請兵助剿左

宗棠飭遊擊羅近秋等各率所部赴甲路助之探聞婺源之賊已竄過中雲初八日左宗棠親率各營進駐鯉魚橋於是分駐甲路之八營與左宗棠相距漸遠初九日逆眾由石嶺分三股直趨甲路王開琳亦分兵三路迎擊殺賊四五百人其後股悍賊亦經我軍擊斃千餘人該逆大敗而走是日婺源大股賊匪已由中雲竄入樂平界左宗棠卽率各營移紮樂平之柳家灣飭後營駐紮黃泥頭橫山截之十一日該逆由沿溝湧山大路而來我軍正由湧山前進突出截之賊眾大潰追殺十餘里斃賊近三千人是日羅近秋等兩營甫抵甲路該逆連夜在徽州添糾大股以圖合圍我軍十二日賊黨大至各營面面皆賊遊擊陳明南往來盪決中礮陣亡王開琳等率各營極力堵禦賊始卻退王開琳等以賊眾兵單子藥米糧已無存留其議全師出險之策於十六日退還景德

鎮其計先後陣亡五十餘人查陣亡遊擊陳明南前於克復德興
婺源案內擬保副將銜應請照副將例議卹其同案擬保外委陳
石臺等均照擬保各職請卹 上諭賊目李侍賢糾黨竄陷婺源
分踞清華街左宗棠督軍進剿扼紮中路奮力衝擊賊眾敗遁另
有大股竄入樂平界復經左宗棠親督剿洗追殺十餘里該逆糾
添大股圍攻甲路營盤遊擊陳明南中殿陣亡殊堪憫惻著交部
照副將例議卹陣亡之擬保外委陳石臺擬保把總趙玉蓮曾文
清喻拔元陳正彪均著照擬保各職交部議卹○曾國藩奏二月
中旬景德鎮十分喫緊臣飛檄皖南鎮總兵陳大富迅率駐守建
德之四千餘人馳赴景德鎮相機防剿三月初三日臣在休甯營次
據左宗棠函稱景德鎮於二月三十日失陷該軍救援不及見已
移紮樂平等語臣以景德鎮失陷祁門糧路斷絕當檄鮑超一軍急

赴鄱陽一路會同左宗棠之師夾擊其時文報梗塞景德鎮附近一二百里一片賊氛失陷情形無從查悉嗣據糧臺委員知府張秉鈞稟稱二月二十九日賊眾數萬在牛角嶺柳家灣回龍嶺三處潛匿距鎮約三十里午刻馬賊百餘由景鎮之南雙鳳橋竄至李村步賊繼之陳大富督全軍迎擊賊不戰而退三十日黎明大霧迷漫該逆趁霧偷過雙鳳橋一伏於都司陳科登營壘之東一伏於遊擊胡鳳雛營壘之南陳大富待霧散後躍馬當先參將田應科隨後將過橋之賊悉行擊退詎該逆大股由景鎮東面觀音閣鈔出我軍分投截擊隊伍稍散而雙鳳橋之賊卽乘虛而入陳大富當先抵禦正中賊子穿過右乳猶裹創力戰該逆分途鈔襲業已進營放火陳大富負傷血戰見營盤火起跳入李村河殉節其麾下參將田應科等同時力戰殉難臣自至皖南於江西省設

立總糧臺景德鎮設立轉運糧臺派張秉鈞等經理軍械子藥概置舟次水師護之三十日騎賊已撲至西瓜州幸水師均在州下之鵝頭灘施放大礮賊不敢偪張秉鈞將軍裝坐船開至西岸卽令護臺水師保護駛赴下游馬家澗復分礮船爲前後中三路護衛各船於四更開行天明駛至古縣渡賊圖圍我船隻搶我軍火乘夜趕築浮橋我軍乘其未合奮力衝出賊見前隊師船去遠飛開快划緊趕我軍且戰且走各船賴以保全僅失去鉛子帳棚兩船餘均無失查皖南鎮總兵陳大富此次在景鎮督軍血戰力竭捐軀大節凜然應請飭部照總兵例從優議卹並於南陵建祠以表忠藎而留遺愛其所部擬保副將田應科等隨同殉難尤堪憫惻均請照擬保官階從優議卹並附祀陳大富祠中以慰忠魂至水師救護糧臺尤爲出力之遊擊任星元等可否懇恩獎勵以昭

激勵又奏江皖之賊分四大股一曰僞定南主將黃汶金卽上年十一月攻破建德連陷六縣者也經左宗棠扼之於景德鎮鮑超破之於洋塘黃麥鋪見聞該逆已赴援安慶矣一曰僞右軍主將劉官方盤踞池州涇旌石埭等處去年冬月破羊棧嶺本年正月破大赤嶺大洪嶺二月破樺根嶺皆係劉逆之黨此股在嶺外距臣軍最近戰事最多一曰僞侍王李侍賢卽去年八月攻陷徽州者也本年二月竄擾景鎮樂平一帶左宗棠一軍二月與侍逆大戰數次臣於本日另摺具報三月又大戰數次該逆已敗潰而去鄱陽景德鎮浮梁樂平一律肅清容臣查明另行具奏一曰僞忠王李秀城去年十月攻陷羊棧嶺經鮑超痛剿破之十一月竄陷浙江之嚴州江山常山等處本年正月攻圍廣信玉山廣豐二月攻圍建昌撫州均以堅守得完見聞竄至吉水永豐一帶距祁門

一千餘里文報久梗莫悉其詳除李秀城一股應由江西撫臣奏報外其餘三股環繞祁門幾於無路不梗無日不戰仰託聖主威福疊獲大勝各股悍賊均已退竄皖南軍務日有起色惟皖北四眼狗救援安慶夾攻官兵營盤十分危急見已調鮑超一軍由景德鎮馳援安慶臣亦卽日拔營移紮東流就近調度上諭逆賊竄撲景德鎮經曾國藩派令總兵陳大富帶兵往援二月二十九日賊由鎮南竄至李村被擊敗退三十日乘霧竄過雙橋分股由觀音閣鈔襲陳大富督兵迎擊身中礮子負傷血戰旋因營盤被焚投河殉節參將田應科等亦皆力戰陣亡其水次轉運糧臺軍械等項該逆意圖搶擄經遊擊任星元等保護尙無損失據曾國藩另片奏鄱陽景德鎮浮梁樂平見已一律肅清著卽將克復情形查明迅速具奏安徽皖南鎮總兵陳大富力戰捐軀殊堪憫

惻著照總兵例從優議卹並於南陵建祠隨同殉難之擬保副將田應科擬保參將蕭傳科胡占鼇擬保遊擊胡鳳雛熊定邦吳定魁擬保守備羅廷材均著照擬保官階從優議卹並附祀陳大富祠以慰忠魂其救護糧臺尤爲出力之遊擊任星元著以參將儘先拔補並賞加副將銜○前任戶部右侍郎杜翻奏擒教等匪四起請飭勝保帶兵赴東剿辦得旨昨已有旨令勝保由京趕緊啟程相機前進以固畿輔藩籬茲覽汝奏東省民團未盡得力著趕緊策勵以補兵力之不足從前擒逆屢犯齊疆無大兵扼守止民團卽可驅令回巢何以有兵以後反不如前○予安徽陣亡副將葉光岳等祭葬世職○庚午諭軍機大臣等前因山東省匪勢猖獗諭令勝保速赴直東交界探明匪蹤親自督剿本日據聯捷奏曲周收復威縣解圍惟探聞山東范縣賊匪復有渡河之信並在

各村插旗裏人聲言欲接南捻過河濮州觀城四鄉被脅亦皆插旗莘邱冠各縣情形如出一轍並荷澤縣土匪蠭起人數不下數萬請飭勝保分兵三路由西北兩面進攻以除巨患等語山東東昌各屬土匪教匪蔓延八九州縣若由一路進攻勢必此剿彼竄自應分道兜捕庶可盡殲醜類勝保接奉前旨諒已由京啟程見在軍情喫緊著卽迅速前進於馳抵直隸山東交界後酌量情形如聯捷所稱分兵三路一由臨清南下進攻邱縣館陶一由大名取道東南進攻莘縣冠縣一由清豐直擣東面進攻濮州范縣是否悉合機宜卽著該大臣酌量情形妥速辦理聯捷原片著鈔給閱看將此由六百里諭令知之○諭前據薛煥奏海鹽等處失守當諭令瑞昌王有齡迅撥勁旅會合攻剿乍浦爲出海要口甯紹溫台在在可通若令該逆偷渡浙東大局不堪設想見在該將軍

等咨商辭煥曾秉忠分軍由平湖進攻水陸會剿著卽嚴飭該員等迅克各城毋令逆匪久踞並令張景渠嚴扼各海口勿使闖入浙東擾及完善之區王履謙前奏乍浦貼近海甯與紹屬之龔山丁家堰瞬息可達該處防務喫緊著卽激勵民團實力守禦據瑞昌等奏紳士謝敬帶勇防堵餘姚海口賊匪私造姚勇號衣意在窺伺甯紹尤應嚴密稽查毋稍疏懈昨據辭煥奏米興朝帶勇退守洙涇顯有畏葸逃避情事已諭令辭煥就近查明具奏其錫齡阿黃金友及地方文武下落仍著瑞昌王有齡查明據實具奏將此由六百里各諭令知之○辛未諭軍機大臣等前因苗沛霖構釁疊經諭令袁甲三妥爲籌辦並因李世忠訴稱族屬被害諭令該大臣傳諭該提督聽候嚴樹森查辦本日據袁甲三奏稱徐宿情形危迫請令賈臻控制全准以李世忠張學醇爲幫辦該大臣

卽抽兵前往徐州等語徐宿匪蹤延蔓前已諭令田在田速籌剿洗並令吳棠整頓團練聯絡聲勢袁甲三以田在田等飛函求援遽欲抽兵前往意在兼顧北路惟該大臣督辦安徽軍務本以堵剿粵匪見在淮南尙未肅清若遽赴徐州恐粵匪擾及臨淮轉不免顧此失彼且苗練句結髮逆肆行無忌該大臣疊次奏報於應剿應撫辦理尙無把握李世忠以族人受害有不爲查究卽欲親往剿辦之語此兩事於大局極有關繫該大臣若以事多棘手委之而去任令苗沛霖等尋仇爭殺未免意存諉卸袁甲三著仍駐臨淮堵剿粵逆無任北犯並將苗練尋仇一事妥爲籌辦不得稍涉游移俟辦理妥協再議移紮徐州方爲妥善請以賈臻等督辦軍務之處此時尙難照所議辦理也將此由六百里諭令知之○袁甲三奏據翁同書函稱壽圍雖已鬆勁九里溝苗練四營我軍

疊次血戰幾克其巢而苗練大股來援橫踞我營之間又復紮營五座擬以兵練全力攻擊尙未知能否得手並云壽城投誠之眾徐立壯之外孫家泰實主之該撫慮其釀禍驅令出城紮營等語是翁同書亦知徐立壯等招捻之謬先欲藉其力以敵苗旋卽不令入城以清內患能否不生枝節亦尙難以豫定賈臻已到潁郡臣卽鈔行署理巡撫諭旨催令迅速接印該署撫初到皖省無所用其回護必能斟酌妥辦昨據臬司張學醇來稟已與賈臻晤商亦以解釋爲是臣諄屬其聯絡團練扼守沙河以保豫省門戶一面整集壽營兵勇相機辦理西路似可無虞惟苗沛霖糾邀黨眾於句結粵逆後麇聚下蔡與徐立壯等勢不兩立以今日情勢論之欲收撫苗練非懲辦徐立壯孫家泰不可但操之過急深恐激成他變且恐爲苗練洩忿後苗沛霖是否仍爲我用亦未能確有

把握李世忠因上游人心洶洶勦撫尙難著手仍折回臨淮與臣
再四計議總期能守然後能戰亦能戰然後能撫見已收撫沿淮
民團散其黨與潰其腹心爲釜底抽薪之計並於臨淮上下游一
二百里內節節布置派委潁州府知府李元忠管帶兵勇會合礮
船駐紮懷鳳交界之沫河口水陸兼防並派都司李魁紮營五河
以扼東路咽喉一面再行派員前赴苗寨宣示 皇上德威如苗
沛霖果能悔悟卽可令其仍隨官軍勦賊以弭隱患儻竟逞其狡
獪叛逆昭彰我軍處處有備亦不至爲其所乘總當審時度勢料
敵決策不敢稍涉疏虞報聞○予山東陣亡教諭王餘吉等祭葬
世職○癸酉諭軍機大臣等前因譚廷襄奏碭南擒匪欲圖北竄
滕縣擒匪擾及兗州當經諭令僧格林沁等速行截擊並令該撫
將東昌各屬匪徒實力勦洗本日據譚廷襄奏擒匪竄過鄒縣直

撲濟甯並分股由濟甯汶上渡過運河南陽東平徧地匪蹤見因水阻意圖回竄過濟因恐曹屬土匪截奪輜重尙在中途盤踞其陽南捻匪欲竄何處尙無確信並曹州東昌匪勢蔓延請飭勝保撥兵助剿等語捻匪竄渡運河僧格林沁派兵追剿在戴家廟迤南接仗剿辦情形尙未奏報該匪恐被曹屬土匪截奪輜重盤踞中途此時正在遲疑之際雖賊眾兵寡未能迎頭截剿亦可擊其中腰截其後尾並奪其輜重以期力挫賊鋒著僧格林沁等督飭官軍相機剿辦不可株守鄒縣坐失事機若能籠絡曹屬土匪使爲我用併力剿洗尤爲妥善其陽南匪眾未必非接應此股並著該大臣等確加偵探設法遏其北竄至曹州東昌兩屬土匪教匪到處滋擾東省兵勇無多不敷剿辦尙屬實情昨因聯捷奏稱東省匪勢猖獗請飭勝保分兵三路進攻本日復諭知該大臣酌量

撥兵前往仍著譚廷襄督飭總兵郝上庠等嚴扼河岸毋令匪徒
得以分竄並添撥練勇與勝保聯捷等兵勇聯絡聲勢四面兜剿
以期漸就肅清將此由六百里各諭令知之○諭前因聯捷奏東
省范縣賊匪欲接南捻渡河濮觀等州縣亦皆被脅請飭勝保分
三路進兵當諭令勝保於馳抵直隸山東交界後酌量情形辦理
本日據譚廷襄奏曹州土匪猖獗范鉅鄆荷定城武等屬隨地
皆匪結成大股蔓及壽張陽穀地方東昌教匪屯聚於莘堂冠館
等屬徒黨日增近又有由直隸清河威縣回竄之匪蔓及臨清所
屬其餘如沂州屬之幅匪武定屬之梟匪及土匪騎馬賊隨地皆
有請飭勝保分兵助剿等語曹州東昌兩屬匪勢日益蔓延該省
兵力不敷剿辦係屬實在情形僧格林沁等在兗州一路堵剿捻
匪其勢亦難兼顧見在曲周縣已無賊蹤勝保前派正定官兵及

伊綿阿所派之兵並成祿所帶馬隊諒已馳抵廣平威縣一帶此項官兵應否馳赴東省勦辦著卽酌量調遣毋稍拘泥將此由六百里諭令知之○諭據翁同書奏苗練圍城情形並壽城餉道梗阻各摺片據稱三月二十八苗沛霖復添馬步隊數千名過淮由菱角觜併入九里溝增紮七營隔斷前敵營盤官軍攻勦未能得手見在潁州府阜陽潁上霍邱懷遠及三河尖等處皆爲苗練脅從聲言句合張落刑攻取壽州並稱山西等省餉銀均到潁州未能前進請飭賈臻設法繞解各等語苗沛霖藉端尋仇疊次諭令袁甲三妥爲籌辦見在壽州城圍未解並誘脅良善冀圖一逞前據賈臻奏稱到潁州後傳見阜陽太和一帶紳士告以官督民團之法無不歡欣鼓舞何以阜陽等處民團又爲苗練脅從若任其徧行徧脅則該練猖獗更甚賈臻前奉旨辦理招撫團練事宜見

又署理巡撫著卽將未被苗練誘脅之民團迅速聯絡其已被誘脅者設法開導使之歸正以孤苗練之勢壽州見有總兵慶瑞等在彼駐紮著卽嚴飭該員等實力固守毋稍疏失並將正陽六安等處妥爲布置山西河南餉銀已到潁州皖南道程鉦親解銀五千兩至潁上縣均著該署撫設法趕緊繞解壽城以濟饑軍該處兵勇尙多儻令餉斷兵潰貽誤大局惟該署撫是問將此由六百里諭令知之○以克復廣東樂昌仁化縣城並江西安遠解圍賞知州周慶夏守備蕭燿煌等花翎餘升敘有差○廣東布政使升任太常寺卿周起濱因病休致給與三品頂帶○朝鮮國王李昇遣使表賀巡幸及歲貢方物○甲戌諭內閣前因各省接遞軍報遲誤諭令兵部將各該督撫臬司等從重嚴參茲據兵部將遲誤時日並未填日期遺失尾單各省分查明開單覆奏湖北山東接

遞晏端書德楞額李績宜等奏報有數日未填接遞日期該督撫臬司等實屬督催不力所有湖廣總督湖北山東各巡撫臬司等均著吏部查取職名先行嚴加議處其樂斌奏報經由甘肅陝西山西直隸等省傳牌尾單係在何省遺失抑係原發省分未經黏連著各該督撫臬司等查明聲覆出兵部奏請嚴加議處其餘接遞軍報遲誤時日之各省督撫臬司等均著吏部按照單開分別輕重議處並著各該督撫臬司於接到部文後按照單開各件勒限一箇月查明積壓遲延之地方官嚴參懲辦其繞道處所有無遲誤一併查明據實參辦至遺失尾單及未填寫日期尤非尋常疏忽可比著甘肅陝西山西直隸山東湖北各督撫臬司挨站根究從重懲處儻逾限延不查覆卽著兵部將該督撫臬司指名嚴參另片奏請將直隸總督臬司嚴議並嚴定填註接遞時刻等語

東直門腰撥接遞文報遲誤順天府兼尹張祥河等業經降旨交部嚴加議處署直隸總督文煜按察使吳廷棟著一併交部嚴加議處至各省文報繞道地方該州縣恃非正站難免有蒙混造報情弊並著各該督撫臬司按照兵部所奏嚴飭各屬查明何處應行改道簽明時日里數毋許稍有錯漏虛捏並將傳牌尾單妥爲收執以便稽查○諭軍機大臣等有人奏捐務亟宜覈實請飭嚴定章程一摺據稱江北糧臺既有指捐借捐礮船捐畝捐而江南糧臺又有米捐餉捐畝捐漕河有礮船捐隄工捐餉捐袁甲三軍營有米捐此外有船捐房捐鹽捐卡捐板釐捐活釐捐所徵甚鉅報解寥寥候補投效以及職員生監營謀札委目爲美差四出騷擾指借則任意訛索卡釐則以多報少糧臺漕河大員多由情託知而不問並有擅自立卡抽收商船捐銀名曰榔頭捐各名目請

飭督辦大員嚴定章程各等語近年因軍餉浩繁不得不借資民
力若多立名目任聽貪劣之員營謀差委藉端騷擾斂怨於民於
軍需報解無多徒肥若輩囊橐實堪痛恨若不嚴行稽查則閭閻
脂膏悉被侵漁尙復成何政體著袁甲三晏端書王夢齡並傳諭
喬松年江清驥嚴密訪查如有多設名目及營謀差委任意訛索
以多報少並私自設卡收捐者卽據實嚴參懲一儆百至所收捐
款亦應設立印簿曉示通衢以杜侵冒中飽之弊並遴選公正之
人董司其事不得濫委多員虛耗薪水總期於軍餉有神而無害
商民方爲妥善原摺著鈔給閱看將此由五百里諭知袁甲三晏
端書王夢齡並傳諭喬松年江清驥知之○勝保奏賊匪竄至直
隸威縣一帶清河失陷見由保定河閒兩路進兵得旨抵保定後
卽相機前進不准以居中調度爲辭致涉耽延又奏賊匪竄至大

名境內批大名府城所關甚要著趕緊設法救援○乙亥官文胡
林翼李續宜奏三月十三日探報僞英王陳玉城於德安隨州各
畱悍賊拒守牽掣我軍該逆仍糾集死黨由蘄州黃廣回竄宿松
境內繞竄宿松縣屬之桃花鋪多隆阿卽派副都統溫德勒克西
金順各率所部馬隊官兵馳往迎擊十四日我軍正在紮營該逆
漫山而至溫德勒克西等乘其喘息未定奮起擊之斬馘多名陳
逆徑竄石牌而入安慶於集賢關外築壘抗拒多隆阿以賊眾我
寡必須添調步隊出奇制勝親自督師前進當派總兵雷正綰等
各率精兵馳往迎剿並派吉林黑龍江各起馬隊爲懷桐兩路策
應二十一日進紮高路鋪二十二日探報桐城廬江逆首僞璋王
林紹璋僞玕王洪城玕僞前軍吳如哮等率大股自新安渡至橫
山鋪練潭一帶連營三十餘里將由馬踏石過河竄往安慶與陳

逆聯合圖解城圍多隆阿於二十三日分飭雷正綰等由下路出擊練潭參將穆正春等由中路出擊橫山鋪參將余福象等由上路鈔擊後山埋伏之賊又令溫德勒克西等各率馬隊由左路金神墩襲賊之後爲牽制之師分途而進該逆出抗我軍奮勇齊攻殲悍賊數十人適余福象等由橫山後鈔至將賊裹在垓心前後夾擊屍橫徧地維時新安渡又出援賊萬餘揚旗疾至多隆阿傳令以三營步隊擊其首以五營步隊擊其腰而以馬隊繞擊其尾該逆前後失措登時潰敗我軍圍殺殆盡餘賊奔回桐城計斬黃衣賊目五名陣斃及溺水死者共一萬餘人二十四五等日逆首黃汶金與敗逆林紹璋等又由蕪湖調到新賊七八千人並捻匪二萬餘人至天林莊築壘二十餘座欲洩前忿竄入安慶二十七日多隆阿密飭馬步隊分伏山隘以馬隊數十人誘之該逆果率

大隊猛撲行五六里我軍伏兵齊起金順等馬隊分兩路包鈔斃賊又二千餘名敗逆竄回天林莊原壘臣胡林翼見添調介字等營並調回副將成大吉一軍多隆阿復添調義中等十三營剋期會剿以期埽平賊壘進克堅城在事出力人員容臣等查明擇尤彙保上諭內閣官軍截剿安慶援賊連獲大勝剿辦甚爲得手著官文等乘此聲威飭令多隆阿等迅埽賊壘克復堅城毋畱餘孽在事出力員弁著官文等擇尤彙保○曾國藩奏據左宗棠咨稱二月十六日全軍回駐景鎮後大股逆匪由鄱陽故縣渡偷渡昌江圍圍景鎮二十四至二十六等日我軍敗賊於袁家灣太園石板橋二十九日賊之後隊由桃嶺范家墩頭竄踞督丹街一帶當派各營分路進剿行抵范家村賊大隊萬餘人分兩枝林立我軍槍礮連施適左路之軍衝殺前來截賊兩段始紛紛潰竄我軍

合隊追至磐丹街沿途踏毀賊巢五處計殺悍賊三千餘名陣斬
僞謝天義黃勝才等賊目百數十名方擬乘勝追剿三十日賊由
柳家灣湘湖街竄入景鎮淪陷左宗棠所駐之金魚橋三面皆賊
後路復斷三月初一日移紮樂平探知僞侍王李侍賢分遣賊黨
畱踞景鎮親率大股圖攻樂平初五日賊至桃嶺塔前一帶初六
日各營三路進剿比抵馬家橋見賊隊列十數層山谷皆滿各營
奮力衝殺賊勢稍卻追至桃嶺見大轎賊目從山坳突出悍賊百
餘護之營官黃少春率健卒持矛叢刺斃悍賊十餘人該賊目棄
轎而逸賊眾大潰斃賊約三千名初七日景鎮之賊一由柳家灣
竄至湧山厚田一由團嶺竄至龍珠蔡家灣並蔓延桃嶺太園等
處初八日飭左右老湘等營分三路前進比過塔前賊卽列隊桃
嶺一帶蠢擁而來左營自中路直撲鏖戰多時賊勢稍卻另股自

兩邊山內齊出包鈔正圍困適守備馬德順率馬隊橫截而來老湘等營亦由右路鈔出右營由左路鈔出轉敗爲功斃賊百餘初十日賊大隊萬餘由龍珠桃嶺一帶湧至排列山岡並於附近村莊放火意在搗我軍急戰我軍按兵不動賊匪猛撲後營營盤州同張聲恆率隊衝鋒遊擊黃少春副將崔大光從兩旁夾擊賊仍抵死抗拒各營兩路繼進中營及各總哨亦疊出策應賊見我軍愈戰愈奮紛紛敗潰擬保副將羅近秋匹馬衝入右營被槍子洞穿登時陣亡擬保守備李啟昭等均力戰陣亡窮追二十里至龍珠始還計斃長髮悍賊千數百名訊據獲賊供稱裨天義李尙揚等初六日大敗後擬卽退竄景鎮僞侍王李侍賢不許復調祁門賊黨並挑選景鎮悍賊親率前來誓與官軍決一死戰本日後隊尙未到齊也左宗棠以賊將復至飭各營傍樂平縣城東南加

修外濠一面調前營四哨入城代守西北一面各營自守外濠十三日賊股麇至距城營六七里層層布陣寬廣十餘里各營憑濠植立寂靜無譁午刻賊撲外濠官軍俟其偪近排槍轟擊相持一晝夜斃賊數百名樂平縣城坍塌已久各營連夜修砌略具城形而該逆環攻徹夜不息其城外民房燒燬未盡者賊伏其中穴牆開礮弁勇屹立城頭未敢稍避十四日賊之大隊漸由東北趨撲西城勢殊危迫卽選道王開化知縣劉典以西城地勢太偏搶護殊難請調各營齊赴外濠出賊不意擊之計議甫定王開化率隊由南門趨西路王開琳率隊趨右路左宗棠自與劉典趨中路每賊一枝以官軍一隊當之未刻各營齊抵濠邊中路發號各路躍出外濠大呼殺賊賊駭愕不知所爲我軍縱橫盪決無不以一當百擬保遊擊史聿舟中槍陣亡各營將士憤極戰益奮賊屍徧地

我軍追至高橋小溪收隊而還計斃賊四五百人陣斬賊目十數
名燒燬賊壘二十餘座據生擒賊供初十十四兩戰李尙揚幾爲
官軍所獲李侍賢於十四日改裝潛遁查李侍賢此次竄擾景鎮
樂平鄱陽一帶長圍近二百里幾成燎原之勢左宗棠一軍前後
轉戰三十餘日六獲大捷斬馘殆近二萬樂平浮梁鄱陽景德等
處一律肅清洵足寒賊膽而快人心候補三品京堂左宗棠去冬
拒黃汶金大股今春破李侍賢大股解祁休之長圍振江皖之全
局勲績甚偉應如何獎勵之處出自 天恩卽選道王開化沈毅
忠實謀勇兼優請賞加布政使銜並賞給該員祖父母父母兩代
二品封典知縣劉典善審地勢身先士卒請以直隸州知州遇缺
卽選並賞戴花翎其餘出力文武員弁容俟查明擇尤保獎陣亡
之擬保副將羅近秋請照副將例從優議卹擬保遊擊史聿舟請

照遊擊例從優議卹並入祀湖南昭忠祠擬保守備李啟昭等及傷亡之擬保都司趙克振等均請照例議卹以慰忠魂 上諭此次左宗棠親督各軍前後轉戰三十餘日六獲大捷斬馘幾二萬人樂平浮梁鄱陽景德等處業已一律肅清左宗棠屢挫賊鋒實屬奮勇可嘉著發去白玉搬指一箇白玉喜字翎管一枝小刀一把火鏹一把大荷包一對小荷包四箇交左宗棠祇領以示優獎其在事尤爲出力之按察使銜卽選道王開化著賞加布政使銜賞給該員祖父母父母二品封典知縣劉典著以直隸州知州遇缺卽選並賞戴花翎其餘出力文武員弁並著曾國藩查明保奏

○曾國藩奏候補三品京堂左宗棠前在湖南撫臣幕中佐辦軍務肅清本省援剿鄰封屢奏大功久在 聖明洞鑒之中上年奉旨襄辦臣處軍務募勇五千餘人馳赴江皖之交方慮其新軍初

立難收速效乃疊擊黃汶金李侍賢各大股以數千新集之師破
十倍兇悍之賊因地利以審敵情蓄機勢以作士氣實屬深明將
略度越時賢可否籲懇 聖恩將左宗棠作爲幫辦軍務俾事權
漸屬儲爲大用之處出自 聖裁 上諭候補三品京堂左宗棠
著幫辦曾國藩軍務○僧格林沁國瑞德楞額奏擒匪圍攻滕縣
經翼長舒通額等帶領馬步兵勇節次進剿屢有斬擒立解城圍
該逆因豐沛鄉民洩放南陽湖水不能南竄於四月初二日拌死
西竄我軍待其過半左右橫擊將賊截爲兩段殺斃百餘名該逆
竄至濟甯城東又經守城存營官兵轟斃多名該逆首尾受敵隨
分兩股一由濟甯迤南搶渡運河初九日由魚臺竄出東境一由
汶上縣過河向南奔竄官兵跟蹤追剿不期該逆竄至鄆鉅時曹
屬不肖之徒悉歸長槍會匪羣相蠢動勾結南捻在鄆鉅一帶盤

踞賊勢甚眾見飭知府趙康侯密約曹屬各州縣鄉團合力勦辦嗣接鄒縣稟報教匪宋繼朋聚集兩萬餘人盤踞鳳凰山一帶四出勾結鄉民焚擄村莊圍攻縣城勢甚鴟張當經臣僧格林沁臣德楞額所統馬步兵勇全數調赴鄒縣並將黃良楷翁吉順所帶練勇三千餘名一併畱營臣國瑞臣德楞額兵勇於四月初八日馳抵土旺駐紮初九日由土旺行至白蓮池見四十餘里村莊房舍燒燬淨盡當即飛隊進攻該逆恃險抗拒我軍奮勇直前將白蓮池山寨外樹柵攻開直抵圍牆該逆死守賊圩十一日我軍馬隊進攻賊寨步隊進攻山頂賊圩殺賊無數正在得手之際該逆由南北山腰擁出賊眾直撲我軍後路臣等督飭馬隊衝擊又殺賊多名該逆始行回山我軍傷亡尙不甚多見在仍回土旺紮營查黑龍江佐領委營總奇普通阿頭受槍傷登時陣亡殊堪憫惻

相應請旨交部議卹以慰忠魂 上諭擒逆盤踞山東滕縣經翼長舒通額等帶領兵勇進剿立將滕縣解圍該逆西竄官軍奮力衝擊殺斃百餘名復竄至濟甯城東經守城官兵開放大礮轟斃賊匪多名該逆分兩路遁去德楞額剿辦嶧縣蘭山費縣等處匪徒先後殺賊六七千名生擒數百名立即正法救出難民甚眾立將沙溝營臨城驛克復鄒縣教匪宋繼朋盤踞鳳凰山一帶經國瑞等督帶兵勇由土旺進剿先後斃賊甚眾墜落山澗死者不計其數並奪賊圩二座著僧格林沁等乘此聲威督飭將弁迅掃逆氛毋畱餘孽奇普通阿著交部議卹○諭軍機大臣等前因譚廷襄奏擒匪由鄒縣直撲濟甯渡過運河分竄甯陽等處並曹東兩屬匪勢蔓延當諭令僧格林沁等相機剿辦不可株守鄒縣本日據僧格林沁等奏滕縣解圍該逆一股由魚臺竄回老巢一股尙

在鄆鉅一帶盤踞鄒縣教匪宋繼朋踞守鳳凰山勢甚鴟張等語
東省各屬匪徒紛紛蠶起勢若燎原若非及早掃除勢將愈聚愈
多著僧格林沁等仍遵前旨督飭將弁並會同各處鄉團迅將各
匪痛加剿洗勿畱餘孽將此由六百里諭令知之○諭據嚴樹森
奏山東館陶縣之館陶集見爲賊踞漕船不能開行請飭山東巡
撫及帶兵大臣速行剿除等語賊竄楚旺豫省存倉漕糧尙無損
失惟山東館陶縣之館陶集爲賊所踞搭有浮橋臨清亦有土匪
恐漕船不能開行著譚廷襄督飭帶兵各員將館陶集股匪迅速
剿辦悉數殲除並將所搭浮橋卽行拆毀其臨清州土匪並著剿
除淨盡催令沿河上下游船隻星速赴楚旺受兌毋得遲誤前據
勝保將派往廣平威縣之正定兵及伊綿阿分撥官兵並成祿馬
隊酌量撥赴東省卽著該撫飭令帶兵之員會同此項官兵合力

勦辦以通河道而利漕行將此由六百里諭令知之○新授雲貴總督劉源灝奏謝授任恩並請入覲得旨著不必來見卽赴新任卿之精力雖稍覺衰老然坐辦尙可見在滇中無人徐之銘措置乖方不知滇省見在作何局面著趕緊赴滇設法補救以慰廑念

○廣東巡撫耆齡奏粵軍收復福建武平得旨出力員弁兵勇查明彙入克復平遠案內請獎○官文胡林翼李續宜奏皖逆前由英霍入楚竄踞黃州疾趨德安孝感隨州等屬因楚師全駐皖疆鄂省存兵無多勦守均難足恃臣官文督同文武員弁扼要嚴防並飭上下江面水師礮船晝夜梭巡賊匪無由偷渡嗣臣李續宜及舒保統率所部於二月二十日均繞至省垣與臣官文面商機宜以賊勢趨重孝感德安隨州等屬窺伺荆襄正值擒匪出巢由南陽竄入楚境上游老河口逼近襄陽荆襄爲中原重鎮一有疏

失北路大局所關較黃州尤爲喫重

臣

等權其緩急

臣

李續宜以

大隊直擣孝感卽於收復縣城後進攻德安隨仍令成大吉等軍

勦辦黃州之賊見成大吉調援安慶彭玉麟督率水師於外江內

湖節節布置

臣

官文又以李續燾等軍赴黃州武昌一帶攻勦賊

由蘄州暗通興國等處土匪勢將蠢動復派知府唐協和等率馬

步一千三百名前往大江兩岸之興國大冶一帶扼紮兼助北岸

黃州各軍聲勢至駱秉章援蜀一軍前經

臣

等奏請暫畱助鄂援

江嗣駱秉章分撥道員劉嶽昭所部勇丁四千六百人於三月初

旬行抵安陸經

臣

官文飭令馳往隨州兼保安襄門戶

臣

李續宜

以潯口爲老營已令道員金國琛等統率各營會同舒保馬隊進

駐德郡之東北偏城而壘惟該逆於德安隨州城外環築木椿數

道周以深濠我軍節次仰攻未易得手三月二十六日德安城賊

由北門出二千餘人撲營經馬步各軍擊退是夜有大股分路圍撲舒保等督軍迎勦陣斬賊目四名斃悍賊五百餘名賊仍敗退入城報聞○曾國藩奏臣於四月初一日馳抵東流鮑超於三月二十五日自景德鎮拔營初一日馳抵下隅坂其所統全軍擬令卽日渡江救援安慶逆首四眼狗陳玉城於三月十八日偪撲安慶盤踞集賢關內外安慶官軍曾國荃等營城賊撲之於前援賊撲之於後勢殊危急幸去秋以來開掘長濠二道有前濠以圍城賊有後濠以拒援賊見相持十三日仰託 皇上威福尙能堅守無恙臣與官文胡林翼等熟商賊以全力救安慶我以全力爭安慶以多隆阿鮑超兩軍會勦集賢關之賊李續宜亦派十營回皖協勦必須攻破陳逆迅克安慶大局乃有挽回之日金陵乃有恢復之望至徽州布置事宜派令道員張運蘭守休甯總兵朱品隆

守祁門湖北提督江長貴守柏溪副將唐義訓等守漁亭沈寶成等守歷口參將楊鎮魁等守羊棧嶺均屬以暫主堅守勿遽進剿臣至東流僅帶五百人以行餘皆畱防嶺內其左宗棠一軍自擊破僞侍王股匪後見已跟蹤追剿無論竄皖竄江均當伺其所向而痛懲之報聞○命在籍左副都御史張芾會同陝西巡撫瑛棨辦理省城防堵○予江西陣亡副將羅近秋等祭葬世職入祀湖南昭忠祠○丙子諭內閣前因各省軍務未戢特派督辦團練大臣勸辦民團以輔兵力原以該員等於本省地利民情較爲熟悉督撫大吏若能與之虛衷商榷共濟時艱於軍務不無裨益乃近日如王有齡王履謙文煜清盛杜翻聯捷等無不各存意見彼此猜嫌殊失人臣和衷之義本日嚴樹森奏毛昶熙於南陽捻匪回巢並不會查虛實輒據軍營飾報單銜入告等語毛昶熙係幫辦

之員此次單銜奏事本屬非是如果虛報勝仗爲所部員弁冒功
地步嚴樹森亦應據實參奏乃不肯明言撤去毛昶熙而以事權
不一等詞空言動聽其器量褊淺意在獨斷獨行豈能逃朕洞鑒
嚴樹森毛昶熙同辦一事惟當共矢公忠同心勦力不得意存畛
域以小節微嫌率行瀆奏其各路督兵大員及團練大臣各督撫
等於防剿事宜均宜開誠布公會同籌辦以副委任儻仍前各挾
私意是己非人以致貽誤地方則是自取罪戾不能以事多掣肘
藉詞推諉也將此通諭知之○諭軍機大臣等據勝保奏進剿威
縣賊匪獲勝並請添調馬隊及飭催軍餉各等語官軍收復曲周
縣城並威縣解圍已據聯捷奏報此次勝保派去官兵復獲勝仗
正可乘此聲威跟蹤追擊著該大臣卽飭帶兵各員迅速勦辦毋
任蔓延范縣教匪圍攻大名雖經官軍擊退並未大受懲創亟宜

督飭各軍奮力掃蕩以固畿南門戶惟山東邱縣館陶莘縣朝城等處賊匪麇集更當兼顧東路以免疏虞前諭勝保酌量分三路進兵此時仍當確探賊蹤趨向相機前進不可專顧大名一路致東路空虛黑龍江官兵五百名已諭令克興阿催令迅速前進所請添派馬隊數百名俟朝陽官兵撤回後再行酌量將此由六百里諭令知之○諭據嚴樹森奏親帶兵勇前赴陳州一摺據稱前沛霖近受粵逆僞封句引髮逆盤踞潁上之楊村及霍邱江口集欲赴光州打糧圖犯汴梁汝甯擒首陳大濤句結平輿大股擾及新蔡上蔡將及沈邱項城又有另股徐四萬等在新興集滋擾土匪蠭起親帶兵勇前赴陳州居中調度等語陳州距汴省甚近苗練既句引粵逆在潁上盤踞圖由光州北犯汴梁而擒首陳大濤等又在汝甯等處肆擾自應嚴扼陳州以杜其北竄之路惟歸德

兵勇半多雜湊前諭令嚴樹森親赴該處軍營嚴加裁汰見在該撫雖已派員前往汰除疲勇並裁撤冗員尙須另募精壯認真訓練陳州距歸德不過二百餘里著嚴樹森於行抵陳州後將各要隘布置定妥迅卽前赴歸德與毛昶熙會籌防剿事宜務須力除積習認真整頓俾兵勇悉成勁旅餉不虛糜毋得稍有瞻徇如苗練肆擾陳州一帶情形喫緊該撫再回陳州相機防剿以遏逆氛將此由六百里諭令知之○以攻剿熱河朝陽匪徒出力賞總兵官成明黃馬桂副都統克興阿巴圖魯名號餘升敘有差○丁丑諭軍機大臣等本日據薛煥奏官軍自埽除楓涇賊卡後逆眾遁回嘉善等處惟嘉定青浦逆匪窺犯松江冀竄金山雖屢經官兵擊退兇鋒仍張又聞蘇州逆目調集賊黨數萬欲爲嘉善平湖乍浦各路援助逆氛四面環逼兵力不敷惟望浙省迅撥勁旅前來

夾攻等語前因浙省平湖乍浦等處失守曾諭令瑞昌等迅撥勁旅會合江蘇援師夾擊旋據奏稱飭張威邦等分兵由海甯進攻並調袁君榮等艇師水陸會剿復諭令飛催前進迅克各城見在蘇城逆賊又有添黨援助之信亟宜督飭官兵兩路夾攻以冀迅殄賊氛著瑞昌王有齡迅催張威邦等水陸進剿會合江蘇兵勇剋日夾擊如兵力不敷卽酌量添撥勁旅乘賊勢敗退之際卽可規復平湖各城以爲進攻嘉興之計將此由六百里諭令知之○予廣西傷亡知州恩錫等祭葬世職○戊寅諭軍機大臣等據瑛榮奏川省軍務督臣專顧川東逆匪李短搭搭等乘虛分竄川北探聞自梓潼至廣元一帶全無兵練防守陝西漢中府與蜀界毗連雖調派官兵出境嚴防惟賊眾兵單恐川兵追賊北竄偏入陝境請飭福濟酌帶官兵由劍州梓潼馳往迎剿等語前因粵逆竄

入黔省畢節縣境距川省甚近曾諭令崇實嚴飭地方文武實力堵剿並諭駱秉章抵川後或親往南路或分兵助剿見在李逆又擾及川北梓潼廣元一帶必須嚴密設防以遏北竄福濟著暫緩來京卽由劍州梓潼馳往防剿該將軍並未帶有兵勇著崇實迅撥官兵交福濟統帶駱秉章計已入川如兵勇可以分撥並著酌量調派以防川北一路福濟到防後著卽督飭官軍迎頭截擊將李逆一股迅速掃除毋任竄入陝境將此由六百里各諭令知之○諭據瑛榮奏四川賊匪竄陷江油之中壩場派兵防堵陽平關大安鎮並已飭署漢中鎮出境堵禦等語四川賊匪李短搭搭竄撲梓潼縣據瑛榮另招奏稱已令署漢中鎮總兵萬福挑兵一千名酌量情形前赴朝天關扼紮並咨會經文岱派兵一千名候調見在該匪既竄至中壩場去陽平關大安鎮較近漢中情形喫緊

所派防堵之涼州等營兵五百名是否足敷分布著瑛榮張芾妥爲籌酌並飭令萬福統帶官兵剋日前往朝天關會合川省兵勇實力堵剿其川陝毗連各要隘亦卽嚴飭該地方文武督率兵練實力防守毋令匪蹤闖入並著經文岱將備調官兵一千名配齊軍裝器械認真操練如果情形比前較緊卽行派委委員管帶馳往堵剿河南捻匪時圖西竄潼關商雒一帶仍須認真防堵毋得顧此失彼將此由六百里各諭令知之○己卯諭內閣前任閩浙總督王懿德由部曹外任道府洊擢總督咸豐八年力疾剿辦賊匪綏靖巖疆嗣因病重賞假開缺回籍上年該員來京以舊疾未痊復降旨令其回籍調理方冀速就痊愈更資倚畀茲聞溘逝悼惜殊深王懿德著加恩照總督例賜卹任內一切處分悉予開復應得卹典該衙門察例具奏伊長孫候選郎中王守愚著俟服闋

後以郎中遇缺卽選以示朕眷念蓋臣至意尋予祭葬諡靖毅○
庚辰諭軍機大臣等本日據聯捷奏賊撲大名督兵擊退請飭前
調官兵迅速前來等語山東范縣股匪攻撲大名府城雖經聯捷
督兵擊退而濮范觀城一帶已成賊穴且與河東鄆城鉅野句結
一片賊勢已極蔓延大名兵力單薄防剿極關緊要前據勝保奏
俟賊抵保定再行酌量情形統籌兼顧見在清河已無賊蹤威縣
亦經解圍勝保已赴冀州所有前派正定官兵八百名景州防兵
一千名成祿馬隊三百名應否分撥前赴大名著卽分別緩急酌
量調遣文煜前派赴大名之天津鎮兵一千名迄今已逾一月之
久何以尙未到防著文煜飛催剋期卽赴大名一帶協剿如帶兵
之員遷延遲誤卽據實嚴參將此由六百里諭令知之○諭前據
嚴樹森奏沈項匪眾滋蔓親帶兵勇前赴陳州督剿當經諭令該

撫侯布置周妥再往歸德本日據賈臻奏擒匪周憨等句結擒首戴魁等圍撲沈邱復分股往沈邱集襲占民寨見挑兵勇數百人卽日親赴西路督剿等語所稱潁西捻匪情形與嚴樹森奏報大略相同賈臻見已親赴潁西督剿惟兵力較單嚴樹森前奏於二十日由省啟程自可卽抵陳州著卽派得力官兵前往沈邱等處會合皖省兵勇實力夾擊毋任延蔓前調赴汴之馬隊官兵著卽挑選二百五十名發給槍箭派員統帶赴潁交賈臻籌給馬匹以資調遣將此由六百里諭令知之○予山東陣亡知縣董涵等祭葬世職○辛巳諭內閣見在軍務未竣亟須多儲將材以備任使近年帶兵各員如羅澤南李續賓李續宜左宗棠等多係寒畯之士經該督撫保奏朕無不破格擢用該員等效力戎行均已著有成效因思此外或寄迹末僚或衡茅伏處自必不乏才能之士著

各直省督撫虛心諮訪如實有秉性忠誠素嫺韜略堪勝將帥之任者卽著據實保奏送部引見候旨簡用惟不得以盜襲虛聲有名無實之人濫行充數至軍營將弁殺賊立功一經奏聞卽立沛恩施優加賞賚其有職分雖卑而謀勇實能出眾者亦應亟爲簡拔以備干城之選並著各路統兵大臣及各該督撫秉公訪察不拘資格專摺保奏一併送部引見用副朕立賢無方至意將此通諭知之○諭軍機大臣等據常清景廉奏俄國通商抽換羊隻請酌量停止一摺俄國在伊犁塔爾巴哈台兩城通商原約有該商販來羊隻每十隻官爲抽換二隻每隻給布一匹見在抽換羊隻無多且皆瘦小不堪而布價較昂於中國旣無裨益該匡蘇勒官來文復有俄國民人喫虧之語自應量爲變通卽行停止以順商情本日已諭知明誼明緒於會勘地界之使卽將伊犁塔爾巴

哈台兩城抽換羊隻之事向該國使臣議明停止該將軍等俟明
誼等議定之後卽行查照辦理可也將此諭令知之○壬午諭內
閣前因浙東團練事無專責當派王履謙幫辦團練並督辦勸捐
事宜原以該員於本省情形較爲熟悉於軍務不無裨益茲據瑞
昌等奏稱王履謙與派捐各紳富大半親友並未督同勸辦先以
挾嫌苛派爲言致各紳富觀望等語王履謙如果徇情庇護親友
勸捐毫無成效瑞昌王有齡卽應據實奏參乃僅以王履謙爲人
長厚親友冀其關照等語空言陳奏顯係各存意見互相猜忌王
履謙督辦勸捐責無旁貸務當破除情面實力勸導以濟軍餉瑞
昌王有齡亦不得任令地方官及委員等挾嫌苛派有失民心該
將軍等其各共矢公忠和衷共濟毋負朕諄諄訓誨至意○諭軍
機大臣等據王有齡奏甯波設立新關徵收外國稅鈔一摺據稱

甯波稅鈔向由上海代爲收納給發免單但無關考成易滋流弊
見在已設有新關令外國人幫司稅務應請嗣後凡外國貿易進
口稅鈔各歸各口各自徵收所有免單認單概行停止等語江蘇
上海關代徵各口稅鈔原因有外國人幫同照料從權辦理見甯
波既設新關且有外國人日意格爲副稅務司自應以各收各口
稅鈔爲正辦已諭知薛煥照王有齡所議辦理矣本日官文奏英
俄各國商船陸續到漢口英國有領事官金執爾同往俄國船到
並未報知來去自由亦無領事官偕來語言不通任意裝載往來
莫從理喻等語漢口江路賊氛逼近外國船隻駛赴通商本多窒
礙若如俄國之任意往來殊滋流弊且載運貨物亦須遵守條約
著奕訢等卽照會俄國嗣後該國商船到漢口務須有領事官偕
往去來必須報明不得任意裝載往來其各國出口貨稅交納稽

查各章程並著奕訢等迅速酌議咨覆官文查照辦理王有齡官文摺片五件均著鈔給閱看將此諭令知之○諭本日王有齡奏甯波設立新關徵收外國稅鈔一摺江蘇上海關代徵甯波關稅鈔原因浙海關徵收各國稅鈔向歸舊關與內地商稅分別稽徵書吏人等無從得其要領從權辦理由江海關代爲徵收見在甯波既仿照上海設立新關且有外國人日意格司理稅務自應照王有齡所奏各歸各口徵收以清界限著薛煥查明嗣後外國貿易商船如由上海等處出口之貨江海等關止收本關出口稅鈔毋庸另給印單代收浙海關進口稅鈔儻稅已交納貨未銷售仍赴別口銷售所收稅銀或卽行發給或給予票據留抵本關下次之稅所有免單認單卽著停止其浙海關徵收稅鈔亦卽照此辦理以清界限而杜影射將此由六百里諭令知之○諭昨據僧格

林沁奏擒匪盤踞鄆鉅已令西凌阿駐紮長溝相機追剿本日據嚴樹森奏曹屬土匪四起十四日考城縣城外望有火光自大韓集以東二十餘團均已隨從擒逆賊馬四五千匹步賊約有數萬邊馬已至考境聲言欲往西竄等語曹州府城被圍曾據聯捷奏報見復蔓及考城勢甚猖獗嚴樹森因陳汝軍情緊急業已出省譚廷襄赴東昌督剿亦屬難於兼顧見在西凌阿駐紮長溝距曹州較近著僧格林沁等卽飭該都統統領所部官軍相機前進務須迎頭截擊勿任擾及完善之區該大臣如有可派官兵並著酌量添派飭令進援曹州以遏賊勢將此由六百里諭令知之○諭前因田興恕奏粵匪竄擾畢節距川較近當經諭令該大臣飭令派出官軍繞出賊前迎頭闌截毋得徒事尾追本日據崇實奏粵匪撲擾畢節縣城已飭敘永文武嚴密防堵惟川黔以赤水河爲

界沿河處處可通並敘州府交界處所上下數百里均須防範兵力不敷分布請飭田興恕多撥援兵前往敘永並由川省接濟軍精以期將此股賊匪翦除淨盡等語四川省監李二逆尙未殄除川南兇復告警兵勇不敷分布係屬實在情形田興恕已派都司田興發帶楚勇五百人往助川防所有總兵楊巖寶等仍著遵照前旨催令督兵前進務於畢節地方將匪眾悉數殲除毋任他竄儻兵力尙單並著該大臣添撥勁旅星馳前往會合敘永官兵痛加勦洗勿令深入川省其官軍應需口糧等項一俟行抵川境卽由川省接濟該大臣務當不分畛域悉心籌辦毋稍貽誤將此由六百里諭令知之○諭前因粵匪竄及畢節距川省較近諭令駱秉章於入川後或親赴南路督勦或分兵勦辦斟酌情形辦理本日據崇寶奏敘永防兵不敷分布請飭田興恕撥兵助勦並因李

藍二逆四處紛竄松潘番匪越嶺夷匪復行滋事儻粵匪復行闖入更難收拾請駱秉章速行赴蜀會同籌辦等語粵匪竄擾畢節本日已諭令田興恕等帶兵會同川兵剿辦駱秉章由沙市啟程計已早抵川境著卽兼程前進與崇實將各路軍務會同籌商分別緩急派兵剿辦以期各匪次第蕩平毋稍遲誤將此由六百里諭令知之○諭據瑞昌等奏常山江山失陷賊偪衢城兼恐旁竄金處一摺已諭令慶端等迅撥勁旅赴浙援剿矣浙江嘉興等郡邑久未克復皖南賊匪復陷江山常山進偪衢州儻令分竄金處勢將通省糜爛著瑞昌王有齡一面飭令道員江允康等實力防守衢州府城毋稍疏忽一面飛飭張玉良親統官軍星夜前進速解衢州之圍卽將常山江山兩城設法收復不得任令賊匪久踞其金華處州兩府屬要隘並著嚴飭各該地方文武認真防堵毋

令匪蹤闌入再瑞昌等另摺奏稱查明平湖乍浦失陷情形已將錫齡阿等交部優卹並將失事各員分別懲處賊匪久踞乍浦勢必由海甯窺伺省城根本重地豈堪震動見在曾秉忠等扼紫洙涇新埭等處卽著瑞昌王有齡飭令該提督相機進剿並將海鹽平湖乍浦等處迅圖克復以期漸就肅清將此由六百里諭令知之○諭據瑞昌等奏常山江山復陷賊匪直逼衢城一摺據稱婺源賊匪竄擾浙境三月二十四日常山失守二十五日江山失守匪眾分股撲衢州府城數逾十萬官軍內外夾擊該匪退踞航埠雖經少挫兇鋒難保不併力來犯等語浙江嘉興府城久未克復乍浦失守以後杭紹岌岌可危逆匪因總兵曾玉明副將林文察等回閩援剿乘虛復陷常山江山雖經該將軍等派張玉良赴衢剿辦而浙省面面受敵實有力難兼顧之勢閩省地屬鄰封赴援

較近著慶端瑞璜體察情形如汀州一帶軍務稍鬆卽抽調勁旅
派委得力大員統帶由政和浦城等處星馳前往衢州一路會同
浙軍實力勦辦所需糧餉並著寬爲籌備帶往以利進行毋稍延
誤將此由六百里諭令知之○諭前因嚴樹森奏山東館陶縣之
館陶集爲賊竄踞豫省漕船不能開行當經諭令譚廷襄飭令帶
兵各員將該處賊匪殲除淨盡迅催沿河上下游船隻赴楚旺受
兌茲復據嚴樹森奏山東土匪盤踞濮州附近匪徒從而響應館
陶朝城鄆鉅一帶徧地皆賊范縣又有另股渡河西竄賊馬駛至
楚旺經兵勇擊退近聞過黃之賊又有數千股數愈多運道阻隔
漕船萬難開行等語山東濮范等處匪徒陸續渡河深入直境偪
近臨漳內黃滑濬一帶意圖肆掠完善窺伺楚旺東境河岸已爲
匪徒往來熟徑必須趕緊勦除以固畿南門戶譚廷襄前派出防

河之署總兵郝上庠知府童正詩等會同布置著卽飭令將鄆城
范渫等處迅速捕剿淨盡毋任久踞河岸來往自如是爲至要將
此由六百里諭令知之○予浙江陣亡總兵官王之敬祭葬世職
建祠副都統錫齡阿等祭葬世職○甲申江西巡撫毓科奏動用
應解浙餉得旨應解鄰封協援各餉已委解有人尙敢擅自截畱
卽使道路有梗亦應設法迅解乃不顧他省止知自顧吾圉可見
汝等外官畛域之見萬難稍釋毓科著交部議處○予江西陣亡
同知胡德璜等祭葬世職○丙戌諭內閣前因副將格洪額在盱
眙軍營被弁兵戕害當經降旨令袁甲三查明有無激變別情並
首犯方保輜等下落詳細具奏茲據奏稱格洪額平日待下極嚴
控馭失宜以致激變尙無另有別情等語副將格洪額旣據查明
並無激變別情著卽毋庸議首犯經制方保輜殲斃尙無實據並

同謀見無下落之同知銜候選知縣栗祥把總李松山王玉鳳柳玉春均著先行革職交袁甲三嚴拏務獲從重懲辦格洪額文案委員江蘇候補知縣玉連著一併革職俟緝獲後訊明如有通賊情事卽著從嚴懲辦○諭上年勝保奏請飭崇恩赴營降旨令其隨同辦理軍務見在該大臣赴直隸冀州一帶剿匪崇恩係見任京堂旣非幫辦之員又非差委各員可比況該員曾任山東巡撫辦事未洽輿情若勝保帶赴山東剿匪於軍務亦無裨益太常寺少卿崇恩著卽回京供職○諭據袁甲三奏剿辦靈泗等處捻匪獲勝一摺捻匪竄擾泗州靈壁等屬並勾結土匪紀遇澂等聚於界溝集日肆鴟張袁甲三派令總兵張得勝等由五河渡河直趨賊圩四面環攻匪眾倉皇出拒官軍槍礮齊施先將鄧賢安賊圩攻破附近之紀遇澂賊圩及丁圩出賊援應被官兵截擊賊圩同

時攻破殲匪二千餘人生擒三百五十六名匪首紀遇瀝被獲正法其河西股匪併入張家圩參將于殿甲等帶兵會合進攻圩賊與援賊勾結紛撲官軍併力鈔擊殺賊一千四百人著袁甲三督飭帶兵各員乘勝搜剿毋任分竄此次出力員弁兵勇著袁甲三先行存記彙案奏請獎勵○諭軍機大臣等前因聯捷奏東省匪勢猖獗請飭勝保分三路進剿當經諭令該大臣酌量派兵前往並疊諭前派正定鎮兵及伊綿阿成祿所帶官兵馬隊酌量撥赴東省會合剿辦茲據譚廷襄奏稱親赴茌平督剿東昌臨清賊匪均得勝仗惟東昌之南阿城七級陽穀壽張等處屯匪甚眾曹屬各縣更不待言如勝保由邱縣等處分起前進則東昌西南北三路之匪必皆分竄東面兵勇單薄惟有盼望前撥直隸之兵迅速前來等語東昌曹州等處匪徒充斥譚廷襄僅帶兵二三千名

馳赴往平督剿恐勝保分兵南下東路兵單防其分竄亦係實在情形本日據勝保奏稱邱縣冠縣賊勢不至復張擬令成祿帶兵二千餘名徑赴大名再以徐廷楷所帶一千名會同王榕吉兵勇防剿邱縣一路已飭伊綿阿由鄭家口等處進逼以清臨清附近餘賊原爲遏賊竄入直境起見惟東省兵勇旣單團練難以持久必須統籌全局以免顧此失彼著勝保體察情形如直境漸就肅清兵力可以分援卽著量派赴東路扼要處所會同譚廷襄所帶之兵合力剿辦使該逆無路紛竄以期就地殲除斷不可稍存畛域之見將此由六百里諭令知之○袁甲三奏接翁同書來函該前撫交卸後因士民攀留未能啟程而苗沛霖親率大隊復於九里溝築營二十餘座長圍掘濠以困壽軍前敵營盤四月初八日米糧軍火俱缺立足不住乘夜退回城下初九日苗練出隊耀兵

直抵南門教場東西排列十餘里數約萬人壽軍未與交仗隨即
撤退是夜忽有馬步大隊由九里溝直趨城下喧傳徐練援軍該
前撫登城瞭望馬隊約千餘人步隊約萬人多係長髮並帶橐駝
十餘隻知係由山東竄回捻匪急令閉城斷橋偵知此股本係徐
立壯句結而來復聞爲苗沛霖句通約爲內應人言藉藉虛實固
不得知而大敵在門隱患在闔情形萬分危急並據另函稱苗捻
均有願撤之信恐皆叵測等語臣接閱愈加焦憤見在臨營兵勇
爲東北捻匪牽掣兼以日久無餉未能派撥前往雖飭署藩司張
學醇督練數千嚴防正陽一帶而賈臻接印後未知進紮何處壽
城被困日久若再苗捻句合爲患何可勝言相應請旨飭催賈臻
迅由潁郡督帶練勇並調集正陽兵勇前往相機妥辦再臣營參
將許保清與苗營副將苗天慶本係舊識彼此交談被苗天慶強

撫之去勸其親見苗沛霖此事自有轉圜頃據許保清稟稱苗沛霖自壽州給伊來信請報讐後兵練合爲一家再圖剿賊屬其靜候面談究竟其意如何尙難臆斷又奏正在繕摺間接上游密探苗沛霖已將所受粵逆僞印僞衣燒毀雖聲言必須攻破壽州而大隊逐漸撤回下蔡亦無與捻逆勾通之事如果屬實似尙有挽回之機臣已密令其同事之人隨時設法開導以冀就我範圍

上諭苗沛霖藉口報復疊次圍攻壽州叛迹顯然雖據探稱所受粵逆僞印等業已銷毀而聲言必須攻破壽州仍屬心懷叵測該大臣此次奏報於應勦應撫毫無把握值此苗練橫恣壽州危急亟應設法籌辦豈得以臨淮兵勇日久無餉未能派撥前往爲詞意存推諉著袁甲三仍遵前旨駐紮臨淮卽行確探苗練情形如果大隊已回下蔡其暫畱許保清係爲轉圜起見自應乘其悔悟

亟加開導令其速爲反正以省兵力儻反覆無常仍欲攻取壽州
卽調派官兵星馳赴援毋任壽州闔城生靈慘遭荼毒該大臣身
膺重寄諒不至始終推諉有負委任賈臻見署安徽巡撫亦斷無
專顧潁西一隅之理著卽將苗沛霖尋仇一事究應如何辦理會
同袁甲三悉心籌酌據實奏聞翁同書業已卸事該署撫一俟潁
西蕺事卽行馳赴壽州以資鎮撫不可稍涉遲緩致誤事機將此
由六百里各諭令知之○追予安徽陣亡知州鄭沅建祠○丁亥
諭軍機大臣等據王明等奏搜捕餘匪追至吉林邊界一摺據稱
協領恩合帶兵嚴搜匪首才寶善劉名得徐洛紅等四月初五日
跟蹤追至八面城地方沿途殺斃賊匪十五名生擒九名該匪出
邊後其分竄各股又復合聚土匪約有二百名到處搶馬更換
逃竄見已過八面城等語朝陽餘匪逃過八面城該處東北卽係

吉林邊境必須迅速堵截以免該匪紛竄景瀄見已啟程查勘地
界著麟瑞嚴飭弁兵伺賊所向迎頭截擊與協領恩合所帶官兵
前後夾攻務令悉數擒獲盡法懲治毋任漏網將此由六百里諭
令知之○是月展緩廣東連平等七州縣被擾地方蠲緩山東汶
上鄒城二縣被擾村莊浙江臨海等三十三縣被災新舊額賦貸
山西保德等十七州縣應還穀石